

謚狀
祭文
表箋
冊文

月沙集
十七

呈文

廿二

~ 16
2345
17



2345
22-17

月沙先生集卷之五十四

謚狀下

三 牛溪先生謚狀

先生諱渾字浩原昌寧成氏號默庵以居坡山之牛溪
學者稱爲牛溪先生高麗中尹諱仁輔之後六代祖諱
石碣禮曹判書五代社諱抑左贊成高祖諱得識左尹
會祖諱忠達金浦縣令贈吏曹判書祖諱世純文科知
中樞府事謚思肅考諱守琛世稱聽松先生少受業趙
靜菴之門隱居守志講明道學 明廟禮遇隆重累以
官徵不就卒贈司憲府執義妣坡平尹氏判官士元之



女以嘉靖乙未六月二十五日生先生於漢京順和坊
十歲隨聽松先生來坡山別業稍長文思日進臨書不
待講說而曉達靡遺十七俱中生負進士初試以病不
赴覆試自此絕意科業專精學問白獻納仁傑以言獲
罪居坡庄先生請業焉弱冠博通經史學識行義大為
一時儕流之冠癸亥聽松先生患風疾危劇先生割股
和藥為灰以進病良已半歲復作又割股肉以進晝夜
不解帶頃刻不離側至甲子正月竟不救廬墓三年
宣廟初年京畿監司尹鉉以沉潛學問孝行卓異聞于
朝除典牲署 穆清殿叅奉吏曹以學行舉坐拜掌苑

皆不赴庚午除積城縣監謝 恩卽還坡山遠近學徒
全集填門先生諄諄訓誨作書室儀立齋規手抄朱子
語錄為學之方寫成一冊以訓學者與栗谷先生論難
四端七情理氣之說長書往復多有發前人所未發者
癸酉除工曹佐郎掌苑持平甲戌自工曹正郎復除持
平皆以病適以典牲主簿有 旨待天氣暄和上來自
甲戌至己卯拜持平者十二工曹正郎者四司紙宗廟
令禮賓判官廣興長興主簿者或一或二皆不赴或謝
恩而適庚辰再除掌令皆以病陳疏 上再旨使之乘
馬轎上來栗谷啓言自 上加恩禮于成渾近古所罕

未知 上意欲用其人乎抑欲一見而止乎 上曰成
渾之賢予已聞知矣第未知其才如何栗谷曰才亦非
一般有可獨任經濟之責者有好善而能用羣才者成
某之才謂之獨任經綸則過矣其為人好善好善優於
天下豈非可用之才乎但痼疾在身必不能任劇置之
閑局而時使入侍 經席則必有啓沃之益矣辛巳拜
宗廟令 召旨屢下力疾入京未能出謝 上遣內醫
看病優給藥餌引見便殿首問大道之要對曰人君必
收拾身心保養精神專一疑定使志氣常清則本源澄
澈而義理昭著矣 上問古今治亂對曰治亂無常形

只係人主一心必得一世賢人君子為輔相廣收人才
列于庶位然後治化可成矣 上問卽位以來所用有
小人乎對曰朝著之間溫恭畏慎阿諛苟容之輩多剛
毅正直引君當道之臣少豈非可憂乎 上問生民困
瘁何以則可對曰量出為入損上益下則賦役必輕恩
結民心為祈天永命之本矣時先生不受祿侍臣言于
上以周急之義輸送米斛不得已受之分與親戚鄰里
進萬言封事申前登對之意而極言之政院請宣示大
臣 上答曰疏中如學問時弊則予當察行但讖議朝
廷太過又欲盡取國制而紛更之其亦難行也蓋先生

之意 祖宗良法至燕山而盡廢尚有未盡剗革者如
進上貢物之類是也而非謂舊章可變只欲祛此病民
之政導 先王成憲而已王堂劄請宣示乃許三公啓
請嘉納採用且請列兼經筵以備顧問 上曰兼經筵
不可創規當更見之適付工曹正郎連上疏乞寢周急
之命不許遣醫劑藥賜之除豐儲倉守始出謝恩 上
引見便殿先生進曰天行健無一息間斷故能發育萬
物成造化之功人君代天理物如有一息之間斷則便
與天地之化不相似矣 經席之上尋行數墨解釋文
義非帝王之學必深培厚養使義理之心常勝而志氣

清明則耳目口鼻之欲自不能用事於其間矣中書九
經大學平治章必以修身爲本尊賢次之大學絜矩爲
應事之要用入理財爲治道之先我國田稅至輕而貢
物至重須裁省貢法使民力舒緩而稅入增加於民於
國俱得其便 上嘉納而貢案不能改 上下教令出
入經筵先生連疏乞免 上命議大臣欲令還家過冬
調病大臣請陞秩兼叅贊官 上命以閑職入侍先生
申辭乞解出次西郊 上聞出城以備忘記召還引見
便殿再二勉留先生懇乞退死 上始許姑歸開春上
來再除執義司饗司宰內膳正皆不起癸未三月特授

兵曹參知三疏適授吏曹參議仍賜品帶一圍三疏乞
免 答曰予不敢以職事強煩當適本職但勿爲退歸
之計宜遵前旨入侍經筵以輔寡昧時栗谷在朝以消
黨論革弊政爲己任 宣廟眷注方隆異趣者忌之居
據公事間微細事三司以專擅驕蹇劾之朝野奮激先
生適被 徵至京上章論救三司又並劾之先生卽日
出城還坡山太學生四百七十人湖南海西儒四百餘
人相繼抗疏 上曰今見儒疏忠肝義膽凜凜有不可
犯者士氣如此予何憂國事又 教曰苟君子也不患
其有黨予願入珥渾之黨也無何又拜吏曹參議 召

旨四下不得已拜 命引對勉諭冬陞拜吏曹參判五
疏不許甲申正月栗谷先生卒先生嘆曰栗谷於道體
洞見大原其所謂天地之化無異本人心之發無二原
理氣不可互發等語皆實見得真是吾師誠山河間氣
三代上人物下能有爲於斯世齋志而歿痛矣夫先生
又呈辭四度不許 上教曰新喪賢宰言念國事寢不
貼席今與子共理國家非卿而誰此豈退去之時乎秋
以焚黃受由歸坡山 上下書于京畿監司曰成某安
貧守道隱居求志因子屢召幡然而來惜其多病暫許
歸山今歲律云暮宜使長吏存問量給食物乙酉以纂

集聽堂上 召三拜同知皆疏辭先是沈義謙金孝元
俱以名流因微事相訾謗先後輩遂相乖隔栗谷啓請
兩出于外而未能鎮靜沈公義謙卽 仁頃大妃之弟
年少輩指爲外戚共斥之視爲一穽先輩以爲沈於權
奸濁亂之時有扶護士林之力及 宣廟嗣位建請徵
召耆喆雖云椒親常在散秩未嘗把握朝權不宜過加
排擊先生以此爲公論後輩遂併劾先生誣以交結外
戚濁亂誤國先生連上疏自劾作遺書分付後事於子
文濟丁亥作自誌文感懷詩及序示門人吳允謙黃慎
至己丑冬鄭汝立逆獄起拜吏曹叅判疏辭不許 教

曰國有大變卿不可退在先生入城謝 恩上疏辭職
又以曾識汝立待罪 上皆優批時右相鄭彥信以通
書逆賊不以實對臺諫論以欺罔先生抵書於當路曰
大臣以一言失實遽被重辟有損王政宋朝未嘗殺一
大臣仁厚可法其論遂寢時逆獄起於摺紳蔓及頗多
天威震怒人不敢解救先生力主和平之論庚寅春上
封事專以緩獄恤刑爲重 聖批例下峻議者頗不平
當此之時有黨論媒孽之幾先生呈告逆職遂還坡山
太學生上疏請留不報自是不復入京 上亦不復徵
召頃之聞崔公永慶以湖南方伯洪汝諄狀啓中飛語

亦在縲紲中作書於松江鄭相澈曰崔孝元孝悌清修
豈有與聞逆謀之理林下善士老入牢獄萬一瘞死則
其何以有辭鄭相之意亦然方欲上劄陳白及見此書
乃於榻前極陳崔永慶孝友氣節必無與知之理上
意稍解壬辰之變先生欲赴難于朝而時黨議甚峻摺
紳相繼竄逐先生以鄭相之親友將朝夕及禍不敢徑
詣闕下聞大駕將西幸謂子文濬曰待罪之臣難於
自進乘輿若果西幸則惟當哭迎於道左如蒙顧問則
隨駕而去不然則罪斥之臣不敢自廁於班列遂使之
入京探報的竒實不料西遷如是之急也俄聞大駕

已渡臨津撤去舟楫津渡不通一路方爲亂兵哭迎道
左之計亦已無及與親宥相對痛哭聞賊已入京避兵
安峽兔山之間病勢轉劇幾絕者數矣光海以世子出
駐伊川有教召之病不能卽行上劄論帝王之學及軍
務十六條光海令視師于義兵將金清軍中仍除檢察
使令與開城留守李廷馨協力進取秋光海送馬召之
先生入成川留數日卽往義州道聞叅贊之命初以不
及隨扈伏藁待罪繼辭新除恩命拜大司憲辭逆還
拜叅贊上疏論選將帥兵聚糧三策仍極論君德以爲
敵國外患不可專歸於天數在昔帝王遇如此之變莫

不痛自警責下詔罪已或去尊號或罪誤國之臣力反
前失使民心曉然知吾君改過遷善之實願 殿下憂
深思遠奮發大有為之志不但見諸空言唯當施之實
事絕近習交通之漸杜宮闈與政之端一以正直之士
為耳目之寄則庶幾人心悅服天道重新本源深培而
綱紀張將士效命而仇敵滅矣 天朝主事袁黃以贊
畫來貽書論學其言主陸氏而絀程朱 行朝諸宰難
其答請先生草報略曰小邦之人皆誦習 皇朝所頒
經書傳註及性理諸書以為此說之外無他道理袁見
之嘉嘆不復言癸巳夏又除大司憲離遼為西樞時

宣靖凌禍及玄宮先生承 命與諸宰奉審莅事詳慎
思慮出人意表諸公歎服還途病劇九月始復 命於
海州行朝未幾 大駕還都留扈 中殿甲午春湖西
土賊大起京城震駭先生力疾輿赴京師上疏待罪
批旨略曰變初過卿廬舍之前而卿不來問今卿來詣
感激流涕云云蓋壬辰西幸之時 上至臨津渡問成
渾居在何處李弘老以兵曹佐郎在前指近岸小村曰
此乃成渾所居 上曰然則何不出見我乎弘老曰當
此之時渠豈肯來見弘老曾往來先生所居知距臨津
幾三十餘里而乘時誣陷乃如此逮 大駕至義州弘

老聞先生赴東宮之召追入成川言於 上曰成某負一國重望而已歸於世子事無可爲者及聞先生到義州 行朝則曰成某之來爲世子圖禪位也 宣廟旣屢聞其讒至是有此教先生惶恐上疏願伏重譴批旨慰諭夏拜左叅贊兼備局堂上上時務十四條第一請罷貢獻貿用物膳䟽下寢不行時 天朝顧侍郎遣胡叅將移咨曰 中國兵疲力竭勢當姑聽倭和與貴國共養兵力以爲後圖貴國備陳此形勢而上奏云是時倭賊屯據慶尚沿邊十三郡日肆搶掠全羅一道獨免兇鋒而兵單糧匱賊至則無可爲廟堂計無所出危急

之機已到十分地頭欲依 天將之咨奏請許和則外間論議攻和甚峻西厓柳相成龍欲入對稟定請先生同入 上問奏聞當否先生以爲國勢危如一髮復少緩兵鋒可圖自強而顧侍郎手握大兵高下在心方主退守鳴綠之議我國旣不能戰又不能守而只禁 中朝之和似是失策 上不答適於其時全羅監司李廷菴狀啓請姑許和以爲緩兵之計左右爭陳廷菴可斬先生素知廷菴有忠信大節且嘉其言出肝膈恐以此重得罪啓曰此人非不知言發罪隨而至誠憂國敢言不諱未可深罪 上盛怒柳相之意亦與先生同而不

敢發言而退自是 上屢降斥和之教先生連上疏自劾三司又交章攻和雖不舉名先生上章乞骸歸坡山門人見先生憾憾不語問何為其然也先生攬涕而言曰吾得罪君父久矣迄未定罪固不可措身於天地之間而偃息在家豈得安心自是憂傷成疾遂至危劇遺書於子文濬曰吾罪名極重方俟 嚴譴時事日就於危急素心未暴於 君父吾死目不瞑矣衣以布衣斂以紙衾編茅蓋棺牛車歸葬墓前書昌寧成某墓五字使子孫知其處足矣遂易簣於坡山書室戊戌六月初六日也春秋六十四先生既歿而羣小仇嫉猶不已鄭

仁弘嗾其徒文景虎上疏誣詆謂崔永慶之死由於先生用事者乘時益肆齟齬以黨奸遺君搆成罪案烏網打士林之計 宣廟以御筆抹去搆殺等語而竟至追奪官爵噫先生本起林下視軒冕為倘來身後得失無與於先生而讒言罔極乃至於此此儒林之所共冤憤者也雖然世衰道微邪之勝正也久矣以程朱大賢猶不免奸邪偽學之目於先生何恨焉天運循環眾無往不復 聖上臨御之初崇獎儒先伸理冤鬱廷龜與今領府事吳公允謙 榻前陳白先生前後被搆曲折 上遂命復官爵厥後廷龜又於慈中請施褒贈之典 上

卽命追贈議政府左議政諸生建書院於坡山舊王配
享於聽松先生國典昭揭士心大定先生之道可謂復
明於今日也嗚呼先生天分甚高德器早成自童幼時
服膺庭訓以孝悌忠信爲立身之根基至其爲學則玩
索精密踐履敦確知行兼進敬義夾持其規模節度一
以考亭爲準則而於操存本源之地尤致慥慥焉充養
之厚造詣之深有非人人所可窺測而自其著於外者
觀之儀貌莊重而有安和之色志氣靜肅而無拘束之
勤言辭明剴動止端詳平居晨起必拜謁祠堂夕亦如
之寒暑風雨未嘗廢也退處書室終日儼然惰慢之容

不見於體接人遇物一於謙和而人自畏敬不敢以褻
慢進也治家有法以節儉慈恕爲務分職授事各有條
理故不勞而事舉喪祭之節一遵考亭家禮器用饌品
必致精潔每穡事畢稱量粢盛而別貯之戒勿他用家
人謹守其訓雖簞瓢屢罄不敢輒取資焉遇先忌哀慕
如初喪以布冠終日先生少多病癯然瘦黑如不勝衣
而神觀凝定眸子炯炯射人每讀書到會意處聲韻琅
然若出金石少與栗谷先生定交講劇道義有麗澤之
益栗谷嘗稱曰若論見解所到吾差有一日之長操履
篤實吾所不及云先生早棄科業韜光林野本無佞世

之志及學成道尊從遊之士益衆聲輝騰聞屢登薦剡
宣廟恩注異常待以不次之位先生力辭不獲雖被徵
赴都恒無久意歷計立朝日月不滿一歲此先生進退
之大槩也自士論分貳世道日澆先生秉心平正絕無
偏係而惟以賢邪消長爲憂樂一爲栗谷伸辨遂被一
隊人所嫉陰譖顯詆靡所不至使 宣廟崇儒禮賢之
盛德不得全其始終而先生抱負之重亦未能展布於
斯世誠可痛也先生文章出於六經根乎性理明白正
大精緊懇到深得濂洛之風讀之使人心融理透疊疊
不厭真經世之心也所著有牛溪集六卷行於世夫人

高靈申氏郡守汝樛之女賢有婦德能持家法生二男
二女男文泳早卒次文濬乙酉進士薦仕爲縣監女長
適南宮冀別坐次適尹煌叅知縣監娶主簿趙堪女生
三男三女長櫟次杓次掇女壻申敏一安厚之尹正得
別坐生二男三女長杰次楸女壻申協金汝鉦尹衡殷
叅知生五男二女長勛舉次舜舉商舉文舉宣舉女壻
李正輿權僑內外諸孫共六十餘人廷龜於艱虞之日
屢獲登拜望見道德之光輝辱蒙一言之推獎慕用之
誠實倍恒人今於易名之狀義有不敢辭者謹就家狀
銓次梗槩如左云

月沙先生集卷之五十四

月沙先生集卷之五十五

祭文

關王廟

親祭文

戊戌五月十三日為承旨時閣
外特命製進口號寫呈

烈烈惟王式闡武功神資拳勇天挺英雄俎豆天下萬
古猶生威震華夷義徹幽明一氣撐柱炳然如日遯矣
偏邦亦欽斯烈幸沾神化陡看新廟瞻聆聳動遠邇顛
倒燕頤虬鬚森然若見赤兔偃月新回酣戰願仗餘威
殲此兇酋保佑東土永賴寘寐

滄死水兵千揔遣近臣致祭文

應製

惟靈胸藏萬甲豪出千人涉萬里之風波忠義是

中流之舟楫性命惟輕龍驤幾搗於賊巢鷁首奄於
鯨海何邦命之無祿痛天意之難堪溫序之旅櫬未歸
幾結洛陽之夢子胥之怒魄猶在應隨浙江之潮菲訖
遠陳不昧斯享

揚遊擊 親臨致祭文 應製

王師恤難震 威靈於賊巢烈士臨危捐性命於戰陣
名聞醜虜氣壯本朝昔陪賓筵恭瞻德宇離違幾日行
饒凱之言旋旋節空回况音容之若接云何上天不吊
罔非小邦之由遺恨徒存幾洒英雄之淚精靈不死定
售殺賊之心嗚呼素幔依依鄉路杳杳襄陽之部曲無

主渭濱之營壘空餘馬革裹屍既遂男兒之壯志麟閣
圖像應垂竹帛之芳名跪奠菲誠一慟長訣

慶尚道舟師滄死 天兵祭文 應製

蠢茲殘孽竊據邊闡肆其狂桀 王師有征蹴彼堅城
號令雷霆揀其健銳航之左海經繞賊背組甲照水弓
砲効技千里順俟天心弗享風勢忽壯波濤震盪摧
棹折盡船顛沒幾箇英烈邦之無祿罪在不諉有痛誰
極南嶺蒼蒼東海洋洋此恨茫茫緬彼江干築地爲壇
蕉黃荔丹魂之在比如水在地庶幾歆只

圃隱文忠公忠烈書院奉安祭文

惟公學闡天人忠貫日月特立獨行高風峻節砥礪
波木鐸偏方百代功澤萬古綱常鬱彼佳城體魄依寧
乃建祠宇敬妥公靈俎豆式陳絃誦有地瞻仰高堅迫
在是矣緬想遺芳立懶廉頑不昧千秋庶幾是安

靜庵先生書院奉安祭文

道東千載天挺真儒淵源鄒魯準則程朱精思力踐勤
味道腴上接不傳下啓羣愚養深積厚德充仁乎精金
義玉霽月冰壺任重經濟羽儀亨衢壁立巖廊皇極之
扶法筵啓沃殷誥周謨庶幾至治陶鑄唐虞禍慘儒
林山頽半途斯文天喪萬古嗚呼 列聖是衛 恩綸

渙敷正論復明天理不誣蔚彼佳城谷蟠山紆體魄攸
藏典刑未渝昌平遺兆武夷名區卜此新祠多士所諏
揭虔妥靈德又不孤警欬如承函丈若趨道在是矣天
啓吾徒享祀自今百世永圖

趙重峯書院常用祭文

忠義大節循良吏績萬代高風一邦遺澤瞻依有所遵
豆攸儀庶歆芬苾以慰興思

敬憲公李

繼孫

書院奉安祭文

院在咸興

瞻茲北鄙地遠 王化風厖俗荒習專云馬昔公安臨
政先敷教廣頌經籍大修庠校勸誘多方諄諄有戶昏

蒙以祛俊民咸舉轉移之機草上之風彘天不泯發
由中頑夫以起懶者有立爭趨俎豆掉棄戈甲治私欲
化如客得歸有待而興榮逾衰衣始時北民恣恣無知
今相講習左書右詩始時北民尚武與勇今遵禮讓家
絃戶誦一變至魯簪紳繼出罔非公賜功誰與匹公反
于天澤留于人緬想德音愈久愈新咸山峩峩咸之水
長我思公恩重建神堂一辨精裡蕉荔芳馨千秋萬歲
神其永寧

龜庵李公書院奉安祭文

惟靈瑚璉之器挺生南紀家傳孝友世篤忠義早事主

庵學有淵源晚從陶山得聞微言勇退名韉適意丘園
函丈依歸發揮講論行休既正踐履斯篤彼血新宇籩
豆有儀庶幾昭格以慰興思

清州三賢書院韓松齋奉安祭文

茂行天篤豪才刃發嫉惡剛腸廉頑峻節盍簪諸賢道
義切磋拱于法筵陳善閉邪天喪斯文禍慘儒林一
片青山萬古銷沉瞻彼新祠不孤有隣靈其永安歆此
精裡

栗谷先生奉安祭文

天爲斯文不墜其傳山河亭毓篤生名賢粹然天

戶部集卷之五十五
四
澈查滓旁搜遠紹妙悟宗旨不循階級已透關鍵前
未發微言大闡造詣自高門路最正文章節義孝友德
性與夫政事皆其緒餘出處之貞惟一終初遭際
明羽儀亨衢辟立巖廊皇極之扶進思致澤退任繼開
禮樂詩書游刃恢恢任他羣猜獨持衡平人服偉量天
鑑孤誠法筵執經吁咈都俞庶振頽波陶鑄唐虞吾人
無祿天奪何速哀動 重宸悲纏窮谷道存書籍功在
儒林遺澤及民受賜到今薈彼佳城谷盤山紆昌平神
兆武夷名區卜此新祠敬妥英靈陟降籩豆宛然典刑
禮盡尊崇士有瞻依不昧千秋永安于斯

聽松牛溪兩先生坡山書院祭文

吾道之東真儒繼作惟天啓迪惟嶽鍾毓間世名賢萃
於一門河南家世洙泗淵源洒落高風沉潛邃學門路
既正踐履斯篤砥礪頽俗開牖羣蒙出處之貞一其初
終睠彼坡山考槃之墟遺芳不昧過者式廬有儼新堂
多士瞻依宛見庭趨如聆瑟希絃誦有所俎豆肆陳一
辨明裡萬古精神

祭聘君故禮曹判書權公文

維萬曆二十年歲次癸巳十月初七日女壻兵曹公之
李廷龜謹以清酌庶羞哭祭于近故禮曹判書權公之

靈嗚呼前歲之事尚忍爲說先生歿之日吾與先山
在禁直先生執吾手曰吾當與汝以死隨扈但吾家無
匹馬老不能步乾糲繩鞋吾已畢具祇恐僵仆道落而
六飛未追寸心莫露也片時相對一涕而別豈知茲夕
遽云長絕朝言在耳便成永訣時耶命耶天使然耶豈
先生之不忍見國破家亡廿一死而不自知耶嗚呼痛
哉先生歿之一日 車駕離京 駕出之二日兇酋入
城偷生是急送死無策蒼皇之際但有號哭盡城奔波
親戚莫救家僮亦散外護寧有急運則無人緩圖則寇
至棄去則不忍欲守則應死茲時煎渴靈必鑑矣遂奉

靈柩姑瘞園裏人非木石豈安於此提携寡孤僵仆村
藪十生九死僅脫虎口逮到楊村聞賊之掘破靈柩衣
衾雖未免於侵竊體魄幸不污於賊手豺狼塞路省奉
無術投身則徒死送人則不達徬徨瞻泣奄經旬月幸
賴神明默佑親舊助誠昇致楊阡權厝一塋惟以脫出
犬羊藪爲幸亦不恨禮制資裝之簡草也如其未備姑
待天日之復照也茲後始與老父挈兩家之眷充離徒
步遠避賊燹艱關間道得達 行在名忝宮僚扈遊四
塞辭違杯土倏隔一歲干戈阻絕消息莫聞豈期一歲
賊又肆虐於斯墳掘破之辱有不忍言當時吾受 命

在 天將幕下聞言震慟寸心如割而身如羈絆不能
奔走收骨祇令家僮掩以藁槨是豈可忍蓋不得已嗚
呼痛哉兇鋒甚毒人力難爲善人亦禍天道無知先生
之二兒隨母轉徙落在嶺外杳隔存亡今逾半輩一女
隨吾糊口西縣一女侍孃就食湖甸一弟四姪飄散東
南飢餓困窮救死不贍四顧無依惟吾一身而半歲塞
上今始歸來赤手何爲肝膽欲摧一掬荒山衰草埋原
精魂何托香火無人人生到此萬事寧論嗚呼哀哉吾
年十八入先生之門受教銜恩于今十二年於斯情猶
慈父義則嚴師先生常指吾而言曰吾雖無子身後之

事有君足矣而不肖無狀智不能燭禍力不能濟事誠
不能報恩義不能奔急懷祿貪生負此寄托幽明之間
永抱無涯之痛茫茫彼蒼此懷誰控嗚呼世亂極矣兵
戈未已人之死於鋒鏑者死於溝壑者十居八九死而
得所是爲不污烏鳶螻蟻達人等視富貴榮華不潤髑
髏先生之苦節清操貞心雅量載諸史而昭人口及其
國家將亡事無可爲也破膽嘔血翮焉長逝其於妻子
之愛爵位之榮曾不以一毫繫况復懼身後之禍患而
枯骨有所顧戀也哉是乃死於忠果其視草間竄穴苟
求生活不啻萬萬也然則雖十遭掘辱於先生固亦功

損獨恨夫天理不可知善人無所勸也嗚呼哀哉先生之二兒在江南幸不死姑待禍亂稍定遣人取來仗之終喪冀其成立以奉先生之祀如其葬事今當竭力土改卜他原以葬遺骸常時數日不拜悄焉疚憤朝昏奉陪言笑琅琅今者違離兩歲始奠一觴靈如有知庶歆菲誠嗚呼言有盡而悲無窮哭不膺而呼不答灑血秋原長慟欲絕靈其知耶否嗚呼哀哉尚饗

祭黃判書璉文

維萬曆三十五年歲次丁未正月乙丑朔二十九日癸巳資憲大夫知中樞府事李廷龜敬祭于近故崇政大

夫行禮曹判書黃公之靈嗚呼余自省事以來嘗見人之善者恒於沉困而不善者恒於華顯善者雖或暫榮不能久保而不善者頑然福祿多至壽考中年以來又見親黨恒凋謝而會合無幾其生者亦落落相望俯仰之間忽焉爲鬼益知人事之喜乖脩短禍福之難恃也噫余與公官爲後進年少二紀而聯翩朝列于今升載艱危顛沛最蒙親愛况公之夫人是余從姑余幼而失慈及長而孤零丁半生但依姻親每省我姑相對悲第以公居西岳余家東駱憂病倥傯會逢難數昔余往矣姑卧沉痾公病積瘁見余握手潸然出涕謂姑病

尚有精英謂公雖瘠氣清神完誰知相繼殞絕日修隔
景言猶在耳計已在門嗚呼公溫雅之質體操之德且
享眉壽以膺遐福而年不及稀遽云長逝信乎脩短之
難常而禍祿之不可理計也惟是慈詳及物之仁使人
不能忘也故聞公之死遠邇親踈莫不悲傷搢紳大夫
交朋故舊亦皆驚奔相吊哭必盡哀豈惟通家受眷之
人獨隕絕而腸摧也哉嗚呼尚饗

祭金守伯履元文

惟公明達之才坦蕩之衷孝友植中恭儉飭躬和如玄
醴穆若條風妙歲策名冠冕清朝金堂玉署歷敷華要

出鎮雄藩流惠甘棠民懷吏畏春雨秋霜炳幾協策再
登勲籍位躋上公名冠麟閣功高不居官貴如儒卜宅
終南晚專一區廟堂丘壑城市山林公退蕭然萬事無
心靜養清福謂宜遐享云何一疾便成疇曩嗚呼余以
晚進托契隨肩襟期莫逆餘二十年暮春之末公在溪
堂一騎往叩顛倒相迎握手開尊歡醉至曛公誇堂勝
屬余爲文竭來幾日三見公書曾未匝月遽承哀訃始
聞若夢驚呼欲仆余齋于官奔未入哭因病乞告荏冉
旬朔即遠有期佳城已卜慟不憑棺真不躬酌奠不臨
穴挽不送野孤負幽明有淚如瀉緘辭寓哀庶幾歆我

尚饗

祭李台徵壽俊文

嗚呼台徵天固生之耶既賦以質之美天故奪之耶胡
嗇其壽與位嗚呼台徵孝友之篤直諒之積於今罕見
君實天得接人遇物誠意可掬聞人之急必盡心力紛
華之地勢利之途退避拙訥一如惻夫至如聞時事得
失論古人氣節則談辯慷慨風生刃發故其邪枉之心
未嘗一出其肝腎使人一見傾心知其為可信嗚呼謂
公材局宜在朝廷以展其志而棲遑州郡屢遭顛躓謂
公愷悌宜享遐壽以為善勸而纔及中年遽見摧折謂

天真漠理亦難悉嗚呼余見自古善者恒於不幸不善
者恒於幸是知君之所得者天而不得者命也然其暫
聚之形不與物而俱化想亦軒昂磊落久而不朽者未
應埋沒於地下則君固無損益於脩短抑亦厭濁世而
蟬蛻也獨惜乎善人君子既難得矣而幸而得之不幸
而易失又如此故每失人未嘗不悲哀踧踖不覺長
號而失聲豈惟朋儕知舊獨為私而多情也一杯來奠
庶歆吾誠尚饗

祭李而立尚信文

已乎而立而止斯耶命之然耶天故為之耶沉厚之器

峻整之儀眷眷孝友之實懇懇樂善之誠一朝奄忽埋
沒佳城嗚呼哀哉生同甲子世聯交情通家伯仲迭爲
弟兄衿陽雪榻習池春栖青燈攻苦坐卧聯裾兩家喪
患共載聚散白髮危班相對悲歎我憂君虛君念我羸
南藩擁節嶺海駟馳離筵握手勗君加餐每見君書王
事靡安君歸瘁甚病已膏肓藥餌扶持庶賴神明云胡
不憇遽至長逝鵬程遠翼中途以稅嗚呼哀哉會合屬
耳筆札在案儀况丹旌語隔素幔殘病人間此生長訣
寄奠一觴臨風隕絕尚饗

祭慕堂洪君瑞文

曩余負譴削迹西湖公時始病俟我城隅睽離幾何三
載松都往事驚心終日悲吁公謂我言知子者吾吾病
幸矣子譴樂乎淚眼相視天地窮途俄焉再訪公已人
扶言雖不爽形換而枯握手而曰吾知免夫在世何心
於分已踰既見君子令我敷腴幸與之訣瞑目泉塗言
猶在耳千古循吏嗚呼哀哉辱固人避榮實世趨公惟
芥視以榮爲虞死生之際不動者無公惟達觀以死爲
娛蓋公厭世羞與同驅富貴腐鼠春秋螻蛄不死如吾
可知頭顱排擠不去觸藩跋胡束濕危班低垂囁嚅每
思公言自愧區區公在九原應我揶揄嗚呼哀哉温温

美玉皎皎冰壺詞華哲匠經術醇儒世固莫如亦公之
汙叔世瘡風人鮮不渝獨持舊聲爲世楷模晚節投閑
混迹酒徒困而益亨不履崎嶇生安死順德完名乎是
公之卓人孰與俱嗚呼哀哉我之知公三十年于公先
我後接武天衢公女我息我子公孤金蘭契叶瓜葛情
紆文酒逢場幾處開壚數日不見命駕相呼公來我往
有醕無醑同聲齊響如鼓如桴激昂宇宙歌咏嗚嗚忘
年之好共至白鬚何知今日棄我長徂長山埋壁大海
沉珠士失前輩星拆天樞歲暮疇依踽踽殘軀嗚呼哀
哉虛庭雪暗小齋塵蕪百年交義一束生芻尚饗

祭洪師古遵文

嗚呼師古人誰無死孰如君死死誰無悲孰如君悲儀
容在眼語聲在耳對酒依然看詩宛爾若兒哭時我淚
長垂我今哭君君其我知嗚呼師古

祭尹月汀文

維萬曆丙辰十月某甲具官某謹以酒果之奠敬祭于
近故海平府院君月汀老先生之靈惟公蓋世勲業驚
代文章名傳華夏位冠巖廊歷駁三朝五十九年而
斗屋蕭然坐客無氈清脩苦節淡若寒士卽公平生槩
可想已若其博雅練達之才精白愷悌之志忠赤奉公

之誠悃福好賢之義固已載之國乘播之口碑容非後
生所可測窺始余射策公掌試闈不腆之文公實發揮
忝蒙賞音沾丐餘波郎僚幕吏薰挹已多餘常推爲老
師公乃寵以少友接武詞壇共至白首十載之間繼主
文盟衣鉢之傳實惟門生迭唱墳篋公鼓我舞睥睨濁
世槌琢萬古斯文之托海內吾徒俛仰陳跡萬事長吁
晨星落落危跡益孤半皆謫籍公又冥途余昔朝 天
公再贈詩今我將行我挽公詞幽明歧路歲暮疇依一
盃長訣我淚盈衣嗚呼哀哉尚饗

祭黃秋浦文

維萬曆四十五年歲次丁巳十月某日友人延城李某
以清酌庶羞之奠敬祭于近故秋浦黃公之靈嗚呼哀
哉子今逝矣我將疇依每一念至如夢而非暮春之月
余在燕山二夜夢子宛爾容顏其語琅琅自謂已還樛
月入懷我淚之潛念子之言或疑 賜環山河復聞道
路脩阻說夢無人問信何所耿耿此心增我勞結其夏
之季我病幾絕忽接家報始聞子訃記夢之日惟三與
五想子戀我魂越神飛與我別久告以死歸驚呼仆地
五內寸鑿子真得還舍我何托嗚呼哀哉昔我求友惟
義與比與子傾蓋同在髻齒魚遊同隊麗澤切磋戊子

之年子魁大科我時布衣松茂栢悅薇垣一謬衆驚子
烈麾之南縣藉甚直聲逮我釋褐共喜成名曾未幾時
遭世陽九流離兵燹越在草莽麻鞋西 扈會於成都
間道蒼皇萬死殘軀春坊講筵共承 恩渥煦沫相濡
義踰骨肉桓桓經略揜戎東臨兵餘講學妙選儒林忝
膺是 命同趨幕府自春而冬備嘗甘苦晝則並袂夜
則聯衾遇興談譎觸物謳吟迭唱填箎沉浸醲郁睥睨
風塵翱翔翰墨發揮遺經探賾幽妙上下雲龍同鳴雙
鳥斲弄萬象槌琢千古播譽 中朝同聲接武一散龍
灣旅食京師子陪鶴駕撫軍南陲我罹酷罰扶服西奔

與死爲隣托之夢魂聞子困讒不安於朝逝矣萊山豹
虎凶驕誰遣真卿繫之賊營二載羈苦一節忠貞銜
命讐庭衆謂必死子安若命湯火不避誓海之文感動
天地怒鱷聽命頑蛟帖耳冰霜之操鐵石之腸一言抗
義格彼犬羊節方蘇卿名將圍隱共賀生還子猶齎憤
敵虜歎服讒者何辭 聖心嘉乃擢以班資賊俄再徇
魚肉湖南節鎮望風大難誰戡臨危授鉞益難其人世
不愛子子不惜身聞 命卽行躬冒矢石孰云不閑誠
悃以激策應振勵拊摩衣鋪墜廢者起瘡痍者蘇我時
送子銅雀之灣繼隨麻將會子完山三日連床死生悲

慰我先承 召一言相謂男兒死耳願言努力睢陽圍
困五坡追扼一劍兵間幾死者數清議忽伸賢路少關
子長憲席爲世楷模正色朝端啓沃嘉謨彼何人斯射
影睢盱子先自劾以直師誣朋儕打盡子亦朝 天我
辭儻相乞歸迤邐新安館裏去來相逢握手兩夜如炬
得蛩子遯于野我又投閑卜居西湖共分一山或陟彼
岡或漁干湄秋燈夜讀春簷晝基交肱而眠枕臂而嬉
占勝窮歡歲云三暮傲視榮途遺落世事謂足自適人
反是基子被齟齬狼狽南遷白馬扶蘇行裝一船慘裾
河上我泗子吡把酒相屬海內吾曹我亦從此迹罕湖

庄見子之廬盡然心傷歲在戊申子以亞卿旋膺專對
奉 秦朝京得朋彙征名聯八座砥行服義忠規補過
時訕理財須經濟手度支之柄舉而專授子彈乃心當
事任怨人莫干私斤斤執憲猾胥斂手宿蠹如掃衆寡
疾舒展臻大道癸丑之事尚忍爲說羣弩亂射駭機驟
發緹騎四出烈於風火六七輩流暨子與我駢首縲絏
同時被逮清霜夏飛白日晝曠各勵素志有以正斃平
生節義顛沛不替天鑑孔昭風霆旋霽不入圜門奠之
衽席數行溫綸可感木石厚渥涵骨追惟夢愕我未釋
負連章乞免子已削迹閉戶而喘臺彈繼起衆口吹毛

月以集卷之三十五
耿介剛直四字恩褒從古人臣孰全是名子今得此雖
罪而榮愛而莫救天亦無權衆爲子感子實泰然海陬
荒僻非人所居毒霧昏瘴茅葦之墟子云何陋累者所
宜疾驅就道如旅斯歸我時譴廢杜絕人事聞子之行
蹙然而起匹馬追送延曙古驛脉脉相看忍淚爲謔二
篇短律悲不意罄欲書怕傳口授爲贈臨別丁寧有言
在耳人生前定孰榮孰悴涯分已踰盛名難久有罪無
罪 聖恩天覆各保性命無失其守以此全歸庶幾不
負子去漸遠延佇靡及短日惓惓回颺颺此日之懷
惟子我知獨歸西郊如狂若癡別來幾何何日不思書

或月至至必滿紙或久不至疾病疑死我困赤牘子寬
我意我縻地部子憂我羸天益困子叩盆有悲窮孤鰥
獨白首何堪子應理遣我實子悵遼陽風雪我車迢迢
路迺長沙欲往伊遙有書黃岡訊我爲別寧知此書便
成長訣嗚呼哀哉子不食酒戒我麪蘖子常善飯憐我
食少不爲事累不以憂撓旣堅且靜宜享遐壽云胡奄
忽理不可究將天不定施舛禍福地或卑湫觸傷臙脉
豈子蟬蛻厭世之濁騎彼赤龍遊崑崙頂或攀胡髯以
從 軒鼎計徹 中宸哀動儒紳恩旨旋下錫命維新
司空掌竈貶贈如儀邦典始完榮豈專私人心大校天

意可想嗚呼哀哉天地間氣子得其正稟有剛柔子得
純剛行有方圓子蹈其方操有清濁子揭其清故能卓
立困而長貞如金之精百鍊愈堅不爲詭隨不受人牽
如玉如冰皦然不滓子之文章根於性理子雖韜晦人
自膾炙子之益下不威而怕子之制事斷以得宜凡子
成就皆學之推師友之傳不愧斯文九原難作萬事何
論嗚呼哀哉斗隕中霄珠沉大海英風已邈直氣日餒
我雖生還可知頭顱親知星散子又冥途忽忽餘生無
人世念羨子高舉悲我昏墊嗚呼哀哉歛不憑棺葬不
臨窆伏枕經秋今始來哭百年交義一杯今夕嗚呼哀

哉尚饗

祭崔伯進有源文

嗚呼壽也者吾不知其所慕夭也者吾不知其所懼豈
善者恒於短折而不善者享其長久耶古云磽磽者易
缺皎皎者易滅理或然耶孰徵斯說已乎伯進胡遽至
於斯天乎人乎邈不可知惟孝源於百行是固君之天
植惟忠赤斷斷國耳實家庭之遺則細行曲謹不失尺
寸剛姿雅量粹然天分聞一善赴如不及見人非若將
浼焉人或謂之好名我獨嘉其守專臨事而有萬夫不
奪之勇片言而能折盈庭之議人或病其過中我獨取

其守志是以敢言人所難言能行人所難行任怨不悔
獨立守經雖顛仆困躓或非笑訾謗終不效依違苟且
媿媿顧望之形此衰世之所難得亦衰世之所難容遭
際 聖明兩朝登庸壬辰蒼黃麻鞋西隨御刀有錫名
著險夷逮今嗣服盡辛艱危殊恩異獎千載一時直聲
清標藉甚臺閣官尊卿相功在社稷顧余踈慵荷君之
知布衣傾蓋白首同歸三十餘年心肝相照蒙君箴誨
盡吾忠告我纔訪君君已病感握手攀號悲不自釋曾
未樂時計已及門驚呼莫定不俟駕奔祀事有戒哭在
于外舍歛莫視寸心不昧嗚呼傷生非孝聖亦有訓豈

以此而奄忽嗟天意之難問抑厭世之溷濁將高舉而
遐征一盃奠芳長慟欲絕靈其有知兮歆我菲誠嗚呼
哀哉尚饗

月沙先生集卷之五十五

月沙先生集卷之五十六

祭文

祭白沙文

維萬曆戊午五月十三日我白沙相公卒于北青謫所
 其年八月初四日歸葬抱川返几筵於東岡之舊廬越
 一月丙戌朔乙未日待罪人延安李某謹以清酌脯果
 之奠哭祭而侑之曰嗚呼天為吾東 聖君作焉必有
 名臣以佐翼之箕斗會精海岳鍾英寔生人豪際遇
 休明凡公之為無所不豪鳳生丹穴五彩其毛鶴唳瑤
 臺聲徹九臯冰壺玉鑑赤帑錦袍望若神仙超然自高

是公之豪形於儀標也接人雅量藹其和平霏屑清言
一座盡傾玉露翻空光風解愠是公之豪發於談論也
軒冕無心烟霞寄想佳辰勝境遇興獨往邀月納涼迎
風引爽是公之豪見於氣象也自出機杼刊落陳言駸
駸兩京疊疊開元渥洼神駒不屑銜轅泛駕橫驅逸氣
超羣此則公之豪於文也臨池落筆一瞬千行驟雨颯
颯飛雪茫茫變態自竒天趣有餘此則公之豪於書也
拾芥一第平步金鑾主盟文席建牙將壇年纔強仕位
冠黃扉素履蕭然一介布衣視鍾彝與台鼎不啻春夢
一幻此則公之豪於宦也公秉化樞與天周旋盡塞倖

穴門常寂然一噓春雨片言華袞英才積於燕雀故吏
遍於藩閫本不預於鑑衡終若挽於權柄此則公之豪
於政也兵戈搶攘左酬右答若不意會俱於理合雲行
電決刃迎縷解應之無跡不滯纖芥事若可爲勇不顧
前後知不可行則袖手斂避此則公之豪於事也頭沛
之際一節險夷柱天勲業談笑了之宇宙再闢浴日麗
空公冠通侯寂若無躬此則公之豪於功也癸丑之秋
禍慘一網有含其沙擠公罪黨上未釋公公早自決匹
馬東門不埃終日如司馬之居洛而封爵猶在同鄭公
之釋位而祠祿亦廢此則公之豪於進退也廷議震動

人皆脅息從違之間立見鼎鑊公既遜于荒野雖不言亦非公責公乃奮筆抗言竭盡平生所抱以隻手扶植二百年綱常流竄困厄處之若嗜好此則公之豪於處變守死善道者也於乎哀哉余於公生少八年仕後十歲推公老兄視我猶弟同舍西朝煦沫艱危接武樞庭迭唱墳箎附驥朝天載惟寒暑襲薰春風三十年所心肝相炤榮落略同自我罹禍公亦居東雪徑尋門秋溪策杖一驢道峯公携我往溪堂共宿我歌公吟睥睨宇宙揚挖古今屬我西翰一夜聯枕公憂我病戒我斷飲逮我病還杜門堦穴羣䟽蝟起駭機將發知公有此

我亦自知扶曳癯羸訪公河湄死生之訣嶺海長離半日傾吐一盃相將我啼欲咽公淚在眶不盡之懷寓之短律欲書怕傳口呼爲說曾未幾時而公之封章上矣又未幾日而余亦席藁埃命洪波振壑赤牘交騁公之行遣無路就別望望槌背病足如縲過嶺之書喜行李之稍健抵配之書云謫居之頗穩繼有三書公已病矣悲辭苦語使我酸鼻余固疑公非復昔昔覆書寬譬技淚寄詩何知今日計先傳而書不達是皆朋知之私慟而余之所以獨長呼而隕絕也嗚呼哀哉疇復如公一心徇國疇復如公泰山喬嶽疇復如公易退難進疇復

如公壁立千仞安得如公坦蕩軒豁之抱安得如公粹
白水蘄之操邊鄙聳矣安得如公之贊理戎政鎮服四
夷人心散矣安得如公之垂紳搢笏不動聲色而能濟
昔危也斯文何所托善類何所恃 朝廷何所倚重民
庶何所仰庇此固輿人之共惜而士林之攀慕而不能
已者也雖然人生何限大名難久哲人自古然矣六十
亦可言壽况國事無可為者終未知稅駕何方日日驚
心事事摧腸此時翩焉長逝瞑目九泉冷然御風何異
登仙公之此行益為豪焉如余者衰白人間獨留不去
親朋已盡誰與晤語彷徨澤畔竟歸何處公賓帝所寧

復我思俯視濁腥應 我生之支離嗚呼哀哉昔我訪
公公愛此廬公今返在 公其樂歎 穆陵之樹蒼蒼王
山之水湯湯羽蓋雲車 日侍 先王公應樂此我又何
傷公乎公乎盡我一觴

祭晚翠吳大年文

惟公溫如良玉不磷且 貞美似兼金百鍊愈精體若不
勝衣而儀表于廷言若 不出口而吐辭則經 兩朝歷
敷守若處子八座顯隆 淡然寒士雍容紳笏獨持聲華
風標映世人莫疵瑕一 麾居留水蘄為治文翁蜀祠叔
子峴碑白簡朝飛單車 夕馳四載郊扉食貧如飴履順

居正蕭然反真公神行天
公澤在人嗚呼哀哉昔我與
公結髮從游公早登朝文
章煥猷公惟先輩長吾十年
標名文苑愧在盧前左提
右挈並驅騷場公執橐鞬押
主齊盟文酒逢歡我歌公謳
心肝相炤共至白頭睥睨
千古步武雲衢斯文之托天
地吾徒盈虛倚伏往事長
吁我方澤畔公又冥途嗚呼
哀哉是月之初連夜夢君
宛若平生尊酒論文了了音
容忽忽告歸覺來不見我
淚盈衣神交默會不隔明幽
我今來哭公其記不

祭長姊崔僉知夫人六

嗚呼不肖弟不祿生而先妣
纏疾未數月而離於母懷

提携抱負惟諸姊是托纔過十歲竟抱終天之痛零丁
孤苦相依爲命姊年長我十二撫我護我如母親子愍
我弱少每見必泣曰吾家兩世惟汝一身草土煦濡日
夜惟望生全又安敢冀其成長而至於立揚乎逮至喪
亂飄蕩之餘仍遭先府君之喪弟既扶服故山姊又就
食湖西數十年來離而復會會而復離然未有經歲不
見之時白髮相對撫念今昔恒以不得同居爲歎今歲
春初弟得罪于 朝將有流竄之 命姊自高陽顛仆
而來見我於城西席藁之所留十餘日涕泣而別姊溺
於愛不知弟之罪重每有書必曰天乎天乎吾弟無罪

願天回照使吾兄弟得母遠離也荏苒至今歲將周矣誰知今日姊遽捨我而先歸也中歲以來姊常多病蓋以鄉居食貧將息少適而然以此爲平生恨然豈知至此奄忽病之五日而伴來索藥藥去之一日而計已至矣奔往而未及屬纊憑屍而未聞一語天地有窮此痛何極余與季姊同門而住日日團圓姊獨遠在疾病飢寒不能以時相問一蔬一肉不得朝夕分飽歲時伏臘不得隨意會合望姊之來日復一日而姊每以墳墓田廬不忍遽棄爲辭誠知其如此姊豈肯守彼而不來弟豈難捨此而相就乎吾姊色莊而氣仁性方而質溫居

貧若富處困若泰真女中之男子而男子中之罕倫以如此之德宜享遐福而晚有一女夭折因之一生悲傷竟以此不得高年天之報施善人一何舛也仍念我先君與先妣皆早世姊年雖未及稀過先君猶一歲過先妣十二歲門衰禍積姊沒之十餘日外舅傾逝昨日又報仲舅亡矣衰病餘生獨留人間一疾經月泔泔床席吾姊入地之期只隔一夜而無由致身竟負臨壙一慟叩心長號聲淚俱盡靈其知此耶一盃寓奠辭未達而情不可終

祭南窓金餘慶文

維靈詩法西崑墨妙吳興是公餘事人或可能清標苦
節貞王精金八十年來唯赤子心世豈盡知我最欽服
昔我東槎屈公八幕非獨才公實有所取今君逝矣誰
我知己後事羊曇遺草文君我來哭君簞瓢在門雪打
寒帷退筆如山一盃長訣泉下人間

祭朴說之文

維天啓二年歲次壬戌九月甲午朔初六日己亥友人
延安李某謹以鷄酒之奠哭祭于亡友南郭朴說之之
靈曰嗚呼惟我與君生既同年死當同歸君走溘然我
獨在世踽踽何依我與君交曰自童稚四十年餘兄及

弟矣兩世通家同隊之魚聯名蓮榜馳譽泮榻我先釋
褐君後四年一鳴驚人文聲煥發辛丑之秋我忝宗伯
君顯天郎我儂 詔使屈君入幕文苑輝光聯鑣千里
經歲鴨塞翱翔翰墨同鳴雙鳥上下雲龍酒賦歡謔清
竒富健各臻其妙君又顓門南窓潤色石峯揮灑足張
吾軍同聲叶契迭唱塤箎風雲受驅赤幟詞壇勝事千
古我輩不孤合久則離乃理之常造物者仇君先投綬
我又辭歸往事悠悠十餘年來落落相望存者未半先
賢受誣多士被錮變極空館我長太學君為祭酒相繼
陳白事雖賴伸君竟遭譴儒林嘆惜癸丑之禍同被逮

繫旋蒙 恩釋三木庚炎君非石人寧免癘瘡我逐澤
畔君又遯荒望之銷魂白沙之亡我哭于筵訪君揚村
一宵聯袂相對如夢我泗君唏逮君播越就食于南輿
疾告歸斗酒城南信宿而去賦詩為別君病已劇我行
朝 天謂是長訣我回燕山久困白簡杜門屏息枯楊
生華兩家有慶君始戾洛我再尋君把酒相慰喜君差
健我又罹讒載遯于野載役于遠七月之初我在西塞
悵然各天養久之書叔夜之報君訃忽傳驚呼仆地川
路賔阻塊越心騁當筵覆盃當食輟哺有淚如綆於乎
哀哉君有懿行進可經世退可儀俗君詩多態力去陳

言駸駸大曆望君之容和如條風無競於物臨事是非
一言陽秋凜凜鈇鉞入君之室環堵蕭然妻飢兒病左
圖右史樂以忘憂終日歌詠君之在家庭草不剪一畝
亦荒當官理煩修舉廢墜櫛垢爬痒君與人言恂恂有
容惟恐傷之一見其非面折不假盡其忠規君於利欲
視之若浼退如惻夫義所當為勇往直前不顧其軀風
流篤厚論議正平不愧儒雅不事表襮不為崖異居然
長者敝衣墊巾潦倒散局自是名流舉世莫疵忌者不
伎不善者羞今其逝矣九原難作奈何乎天繫吾衰疾
生胡可戀死亦誰憐自君之亡生意都盡此心如癡千

戶部集卷之五十六
里歸來一病支離官謗亦隨窮秋閉門別懷慄我思
伊誰君今將發風雨淒淒去欲何之強扶羸骨來哭祖
筵君知不知

祭李而遠文

嗚呼人有恒言有德者必享其報先民有言仁者必得
壽考以公之德年未及稀人爲公悲我獨不悲嗚呼公
一魁多士再魁大庭平步雲霄位冠上卿公之華顯不
已極乎三子四婿聯登桂籍膝下長男同拜尚書公之
榮耀在古無如子女若孫七十有餘呼公會祖者又過
二十公之福祿中令莫及立朝四十年名不掛於吏議

宿名重望無替終始致此何術公有厚德惟恭惟儉一
心敦恪有才若訥無怨於人穆如條風和若陽春既有
此德宜享此福享此既久歸亦可以綽綽生固寄也在
世支離未必樂也公雖未及大耋其視蹶躄塵埃老猶
不死者所享孰多孰少是知齊彭殤等榮辱長者不爲
壽短者不爲夭了事人間浩然而歸是公之志我又何
悲人間路短泉下期長此別非遠盡我一觴

祭鄭時晦文

嗚呼自君之逝在世無樂猶蚺失蛩若車脫輻身如去
體心若奪魄音常在耳貌常在目逢人輒疑夜夢則覲

日望君廬淚眼如濯聞君將發冥路益隔白髮餘生踽
踽何托講筵今寂法言誰沃友道長休忠規誰益我儆
皇華役役晨夕崇朝風雨撥忙來哭哭不盡聲文不盡
臆述子平生當詳墓石一杯長訣庶幾歆格

祭柳川文

維天啓十年歲次丁卯八月甲午朔十五日戊申行議
政府左贊成延安李某因病在暇謹遣子昭漢以清酌
庶羞之奠敬祭于近故領敦寧府事西平府院君柳川
韓公之靈嗚呼太和之精元氣之真鍾于德門篤生偉
人爲瑞于國賁飾鴻猷爲祥於家啓無疆休是公福祿

天實相之惟公德望庭訓之推入提文柄出揔戎寄是
公餘事亦公暫試我之知公四十三年攸害之言未嘗
聞焉心肝莫逆意氣相孚布衣交情白首不渝文酒逢
場有醕無醑墳笈迭唱海內吾徒同罹禍逐迭被起廢
觸藩行役困于進退逮遭 聖際具已暮境對說悲歡
相憐同病云胡今日棄我長逝星拆中霄士失前輩嗚
呼卽遠有期歸楫已具殘生病眩欲起還仆奠不躬酌
挽不送野緘辭寓哀有淚如瀉嗚呼哀哉

祭象村文

維崇禎元年歲次戊辰九月戊午朔初八日乙丑友人

戶部集卷之五十六
議政府右議政延安李某以清酌庶羞之奠敬祭于近
故大匡輔國崇祿大夫議政府領議政玄軒申公之靈
嗚呼昔余與公結髮爲交同登蓮榜同席天曹迭唱墳
箎如鼓如桴睥睨濁世天地吾徒標名文苑押主齊盟
左提右挈並驅騷場同鳴雙鳥相逐雲龍出倫交契曠
世遭逢物忌盛名究弩潛射癸丑之獄駢首三木公歸
田里我杜郊扉一水盈盈不斷音徽逮至戊午禍慘一
網並遊諸人相繼流放我困白簡公又遷謫一別十年
晨星落落所不隔者兩地肝膽所常聚者精神默感豺
虎叢中驅我燕行公時寄詩有書盈箱去訣死去還慰

生還其言甚戚每見一潛 聖人有作羣彥嚮風公來
自洛一馬二童一命冢宰再命文衡三命黃閣若收遺
羸公惟感勵益殫忠赤玉立巖廊都人拭目百辟洗心
庶明振翼余以謏劣亦忝伴食庶幾夙夜一乃心力蕭
曹遵畫范韓推轂憐我衰朽一生癘疾喜公康莊精華
溢發云胡一病遽至於斯斯民無祿天不憖遺嗚呼哀
哉公今逝矣國其如何西鄙日聳戍卒枕戈疇運機籌
內修外攘歲丁大侵道殣相望疇秉化樞奠民衽席夷
情難測疇能鎮服人心已散疇能撫緝靜思今日存亡
危急雖有智者亦無所施若涉無津但有焦思脫洒萬

務翩然長逝公之快適何異蟬蛻我自失公在世無樂
身如去體心若奪魄獨立人間踽踽何托晝詠公詩夜
夢公儀森然在眼何日忘之哭不盡聲文不盡臆百年
情義一杯今夕

祭芝峯文

惟公溫如良玉皎若冰壺詞華宗匠經術醇儒體若不
勝衣而足以儀表多士言若不出口而足以鎮靜浮議
雖士論乖張而人不敢謂公偏黨雖禍機屢發而世不
敢加公文罔十年屏迹沉潛書史遭際 休明倏起亨
否獨持舊聲爲世完人翩然長逝蟬蛻囂塵死生細事

脩短寧論功名外物崇卑何言存順沒安得全而歸公
應無憾我又何悲嗚呼哀哉結髮論交四十餘年標名
文苑愧在盧前左提右挈並驅騷壇同聲齊響相照心
肝嗚呼唯我與公一生多病我常任劇公能靜養每一
相逢各問筋力頗喜稍蘇天何奪速玄友之歸相持一
慟曾未幾月我又來送泉下漸多地上漸稀獨留衰白
踽踽何依一代風流千古絃絕緘辭長訣此心如結嗚
呼哀哉

祭內舅金叅議文

曰余零丁早失所恃長于外家依于舅氏惟叔與姪如

兄及弟爰自髫鬣同衾聯袂文墨杯觴迭唱埴篲學舍
山齋負笈追隨連登桂籍共躋卿班十年離合幾度悲
歡一日不見我往公呼開襟對笑有醕無沽庶幾百年
孰云先亡嗚呼至行孝悌餘事文章朝端老成座上風
流今皆已矣寂寞山丘伯氏之計月日又同棠棣之樂
泉下融融獨留人間踽踽何托哭不盡聲文不盡臆一
杯長訣庶幾歆格

祭完平文

惟公金玉貞姿冰蘖苦節經綸大業匡復偉烈與人皆
頌草木亦知國史載之何贅我辭壽邁之衰身歷四

朝五領三事禮絕百僚達尊今古誰復如公保哲完名
翩然正終在公無憾惟我之恫盈盈一水莫不得躬緘
辭寓哀庶歆微衷

祭五峯文

余年十六始聞公名隣交門會謂公我兄見公文章推
公詞伯一代 恩遇聲華煥赫及余登朝並驅騷場雲
龍相逐迭主齊盟心肝莫逆五十餘年向來悲歡欲說
茫然公卧郊扉我抱沉痾經年離索會合無多今歲之
春公過我廬倒屣而迎白髮相扶憐吾衰憊喜公康健
仁卿之第又見公面酒後豪吟座上清謔風流瀟灑死

如平昔曾未幾時遽聞公訃驚呼眩倒欲起而什人誰
百年在公無缺我獨留世受困造物一杯之訣亦未躬
奠欲寫衷情有淚如綫

祭姜仁卿細文

惟靈資品之美行誼之篤志操堅貞襟懷洒落相門清
議麟閣勲名年尊大耄位躋上卿余纔弱冠始與公文
榻聯南岸隣接西郊載酒揚湖秉燭宣城中間離合歲
月屢更精神不隔魂夢相牽去歲春冬再會酒筵喜公
康健憐吾衰朽曾未幾月遽聞公訃撫枕驚呼飲泣吞
聲餘生踽踽益無世情平生之酒無復勸君數行侑辭

哀不能文

祭朴子龍文

崇禎八年乙亥三月庚辰朔二十五日乙亥友人月沙
李某病在床席不得出門僅具薄奠敬祭于亡友梧窓
朴公之靈惟靈明敏之才練達之器好善之誠急人之
義孝友至行出於天得風流映發表裡無隔文酒逢場
豁若平生兩世一家呼我爲兄聯名桂籍接武臺閣癸
丑之禍駢首三木悲歡榮辱十年離合精神相感寤寐
如接萬死歸來各保衰白庶幾餘日杖屨阡陌何知奄
忽便成千古撫枕驚呼欲起還什暝境朋儕日歸泉壤

存者亦病落落相望不病者近病者疇依緘辭寄奠有
淚盈衣嗚呼妙歲高勲英名冠世展布才猷人共期待
一廢不起終止於斯云亡之痛不獨為私嗚呼哀哉尚
饗

哀辭

李永柔有吉虛葬哀辭

表獨立兮荒郊掇芳杜於湘澤攬涕兮遠望吊國殤於
天之北昔爾之去兮訪我於河湄佩郡綬之若若兮帶
長劍之陸離謂西方之有難兮將余赴乎 王師曾曰
月之幾何兮事大謬兮天不助領前茅兮當一隊凌虜

障兮越險阻風埃捲地兮沙礫擊面車錯轂兮矢交墜
輦三創兮飲血賊騎如雲兮救兵不至左驂殫兮空拳
張士伏弢兮鼓不起力已竭兮心不渝身離原野兮骨
暴沙磧悲先軫之反兮痛臧洪之同日彼豎子與老
奴兮制中權兮擁後勁仰凶酋之鼻息兮爭嚮風而趨
命驅七千之健卒兮若羣羊之交頸束強弩兮解堅甲
藏麤拳兮斂長臂壺漿迎兮款話言忘 厚渥兮背大
義哀爾眇小之丈夫兮一行間之校尉奔有路兮降有
徒豈不知生之可樂兮死之可畏臨大節而不苟生實
平生之所守子能仕兮教之忠吾知爾之有所受念爾

祖於先輩兮詞華括匠兮經綸大手謂爾之妙年投筆
兮初若忝乎所生及今成就之若此兮真可謂不墜家
聲縱不能立功異域其視太祝奉禮僅持門戶者奚啻
天壤為臣止忠兮以死報 國亦乃祖之所望故山兮
何許關塞長兮楓林杳杳魂兮歸來千秋汴水兮應有
雙廟

月沙先生集卷之五十六

月沙先生集卷之五十七

表箋

欽賜焯硝弓角謝 恩表

威張九伐方恢攘夷之功寵錫百朋獲紆除戎之具銜
恩獨厚拜賜還慙伏念墜三韓之舊基綿一宮之殘業
瘡痍未起憫秦寇之又來疆圉卒荒悲雋削之滋甚念
茲軍械之欠缺其奈國計之空虛疾痛必呼惟恃父母
之過愛緩惡是諒輒荷乾坤之曲全爰發大僕之兼珍
俾資下邦之利用准關石以易賣悉防侵欺雇餘金以
轉輸並免稽滯征繕可底於克詰備禦足藉於良材強

弩射疏喜神武之遐暢烈砲震遠仁妖氛之廓清師旅
騰歡壁壘增固伏遇廣運德大博苑仁隆軫衰微之莫
支屢加拯濟憤兇逆之益肆荐行殄殲遂令敵藩偏被
洪造敢不卧薪思奮結草圖酬殺賊告成少弛東顧之
慮瞻天薦壽倍殫北拱之誠

賜內厩馬及馬粧謝 恩箋

備負騎省方竣瘞曠之誅申 命螭庭忽荷便蕃之錫
驚惶數日感淚千行伏念自守迂愚獨承知遇執羈勒
以奔走素乏末班之勞冠章甫於會同竊慕小相之願
幸因乏使於朝著叨忝傳命於賓筵縱曰能之特一薄

技未之學也徒是虛名非但昧昧無聞抑且期期不語
清聯峻秩曾玷鵷行之舊恩寶篋雲紗纒渙銀臺之新
渥職分未效於應對絲毫寧補於周旋仰玉色之勞勤
曷勝犬馬之戀承天語於咫尺已極臣子之榮方憂福
過之有灾詎意資典之荐及鮮粧璨爛僭分九重之珍
歲逸足權竒頒出六開之神駿振策而街衢動色拂拭
而蓬華生輝揆分何堪不衷為懼伏遇恢張庶務駕馭
羣材一藝亦庸方恢延攬之治弊袴必待克懋功賞之
規遂令賤蹤亦沾異數敢不策勵駑鈍榮戴龍光雖顛
沛而不渝更堅初志苟筋力之所到敢愛餘生

校正廳日 賜宮醞五瓶謝箋
道家蓬山新覩盛事宮壺法酒更紆殊恩何幸親逢實
非始望伏念臣等俱以謏劣遭際休明小技繫鉛素無
窮經之實殘生荏苒已過學易之年適值右文之辰獲
玷登瀛之選木天丹地空叨東觀之光榮玉軸牙籤復
見太平之文物魯魚未辨常恐誤了全書伏獵多譏敢
言正得幾字方懼素餐之刺詎意香醞之頒日給五壺
多於學士之一斗分出內府寵逾淳化之上尊光澈杯
心冷馮金莖之秋露香浮疊面暖挹赤岸之春霞何憂
直衾之寒可解文園之渴伏遇學闡前聖道啓中興編

三傳於麟書親定筆削序十翼於義易妙觀天人臣等
敢不飲德含香霑恩醉澤青蔥夜訪縱愧博學之名白
頭老監庶遂枕書之願

千秋賀 皇太子箋

貳極正位咸仰出震之休光千載爲秋聿回繞電之佳
節照臨所暨蹈舞攸均恭惟偉量淵冲英才玉裕三朝
盡禮夫孰加於孝乎四海傾心曰吾君之子也茲屬虹
流之慶益膺川至之休伏念荷天之靈既骨而肉謳歌
歸啓縱阻玉帛之班壽富祝堯徒切華封之悃

王候復常臨御經筵賀箋

無妄勿藥仰玉宸之臨筵求命維休瞻寶曆之增筭神明所佑宗社同歡恭惟致夜憂勤罔豫宵旰大德得壽祿蕩蕩乎無能名百姓見羽旄欣欣然有喜色宜膺景福之滋至益觀盛烈之重恢伏念屬縻圻藩阻綴賀列咫尺輦轂莫窺晉幄之天開頌祝岡陵徒切葵忱之星拱

皇太子冊立頌 詔後謝 恩表

少陽重明丕衍一索之慶大號申命恭承十行之綸蹈舞攸均感戴斯極伏念僅紀墮緒偏荷隆私復冠裳於介鱗餘生再造拜詰冕於灰燼舊邦惟新茲當開泰之

昌辰獲覩崇封之盛典三韓拭目驚使華之自天四海傾心仰前星之出震德音覃布於遐邇寵賚遍及於存亡喜實同於幅員恩獨優於藩服伏遇稽若成憲規恢遠圖付托得人為宗社萬年之計謳歌與子啓本支百世之休遂令微臣亦叨異數敢不恪修侯職思答皇仁母死復史更霑東漸之化不違咫尺倍殫北拱之誠

冊封 皇太子後 慈聖皇太后加上尊號進賀表

慶篤文孫既睹封建之茂典禮尊堯母誕舉推崇之縉

儀歡騰兩宮喜溢八表欽惟至德也已達孝矣乎奉庭
闈之德音愛敬盡九重之養定宗社之大計元良得
萬邦之貞茲當少陽之新升增上長秋之舊冊四字燦
爛孰云厚載之難名三靈協和益見太平之有象壽域
綿祉寶曆彌光伏念獲保餘生重逢盛事迹滯箕壤縱
阻鰲抃之班誠切華封庶效嵩呼之祝

實錄廳 賜宴謝箋

臣等於萬曆三十四年五月五日以累朝實錄重印事
完伏蒙特恩一等賜酒又加宣賜內醞臣等不勝感激
之至謹奉箋稱謝者臣等誠惶誠恐稽首稽首伏以繙

木天之寶簡方奏訖功需需雲之渥恩猥荷賜宴實非
始望何幸親逢伏念喪亂餘生鉛槧未藝沐先王之
遺澤咸固生成際盛世之中興再覩熙洽頃緣實錄之
續印獲忝載筆之華聯東觀西廂點綴朱墨之眩金章
玉牒考校亥豕之訛負役數百人之多首尾三年之
久在信史之一本用活字而重新文謨武烈之足尋內
閣外局之兼補常愧餼廩之徒費尚喜篇帙之纔完詎
意微勞曲垂隆眷上尊法酒浥秋露於金莖太官珍羞
供夏膳於角黍式邀以燕不醉無歸伏遇旋乾轉坤光
前啓後百年禮樂煥焉文獻之有徵一代規模巍乎功

戶部集卷之五十一
五
德之可述用修不刊之典丕闡無疆之休遂令縉儀覃
及賤品敢不益堅素節思竭丹忱歲名山副京師竊慕
子長之志祝多男獻壽富敢效華封之誠

附廟後東宮進賀 大殿箋

升配宗裡昭格十二聖之靈貺端臨法殿誕膺五百年
之昌期 廟社鼎安神人泰悅恭惟道扶皇極制備人
倫喪盡哀祭盡誠達孝之舜志善繼事善述有光于湯
縉儀成於穀朝歡聲動於綿宇伏念忝居儲位恭奉簡
辭仰宣室之受釐第勤問寢之職獻華封之祝壽永贊
垂裕之休

附廟後百官進賀 大殿箋

俯就通喪既終中月之制升俯太室永綏配天之靈禮
秩神人慶關 宗社恭惟憲章先烈損益彌文御極凝
旒鴻圖丕闡於一代虔誠祀聖孝高出於百玉甫畢
明禋之縉儀爰舉曠世之茂典伏念依光日月備位台
衡奉籩豆而趨蹌重逢盛事瞻黻冕而舞蹈自幸餘生

大妃殿上尊號後玉世子賀 大妃殿箋

止於慈止於孝咸仰聖人之盡倫有其實有其實備舉
寶冊之盛典宮闈增重寰宇騰歡恭惟德合黃中位尊
太上協內治於七載化行閨門殫哀慕於三年誠掩禮

制宜膺渙號以賁坤稱伏念忝儲位於湯孫服庭訓於
文母三朝效職不替視膳之勤萬壽延休永奉含飴之
樂

大妃殿上尊號後王世子賀 大殿箋

繼序不忘既敦善述之孝顯親為大爰舉寶冊之儀喜
溢三宮歡均八域恭惟業紹蕩蕩禮隆尊尊堯以是傳
道莫高於虞舜文所以聖德允協於太任一國養猶未
盡誠二字號寔用加薦伏念忝居儲位獲際昌辰致三
朝之婉愉恭為子職聯百辟而蹈舞益切嵩呼

中宮冊禮後王世子賀 大殿箋

上聖盡倫丕闡王化之本中闈正位率循邦禮之常冊
命維新興情胥慶恭惟家齊而國父止於慈建皇極承
丕基治成內外修明禋薦徽號孝通幽明茲畢臨軒之
縉儀益隆承祧之洪福伏念忝居儲位獲覩昌辰夏清
冬溫第勤問寢之職天長地久倍殫祝壽之誠

中宮冊禮後百官賀 中宮箋

宮闈位正久仰宸極之儷尊寶冊禮成載瞻明庭之渙
號長秋瑞色廣廈歡聲恭惟配日為明承乾其順在宮
在廟光嗣太妣之徽音宜民宜人丕闡關雎之美化爰
舉縉典益膺休祥伏念猥以具僚叨逢盛事二南風教

月沙算卷之五十七
七
適當雅頌之興百世本支恭獻壽富之祝

冬至賀表

天地之心聿見來復之節日月所照咸暨會同之期萬
寓歡聲三階瑞色欽惟體乾之健行夏之時順一氣而
調元敬授平在之象齊七政而熙績茂對發生之功茲
當履長之辰益膺交泰之慶伏念幸際昌運新荷隆私
迹阻虞庭莫送玉帛之列誠懸漢殿不違咫尺之威

正朝王世子賀 大殿箋

王春正月聿屆元會之期 聖壽萬年誕膺無疆之福
三靈叶慶八域騰歡恭惟績撫五辰道齊七政照臨發

育若日之方中博厚高明如天之為大茲當令節益擁
純禧伏念叨居國儲祇奉庭訓乾稱父坤稱母與羣品
共荷生成海重潤星重暉為子職倍殫忠孝

我國漂流人解還謝 恩表

神威誕敷藩服既脫於塗炭至仁並育微物亦與於生
成采增感銘曷勝驚惕伏念僅紀墜緒偏荷殊私若涉
無津久昧縹緲之戒欲報罔極恒切糜粉之誠何圖子
遺之民復遭漂淪之厄風濤千里幸近父母之邦雨露
九天俯全螻蟻之命免被魚腹之葬獲返狐首之丘伏
遇惠侔乾坤功參造化包荒量廓舉四海而同春拯溺

恩深疇匹夫之失所遂令肖翹之賤得奠絰席之安敢
不思答鴻庥益虔侯度撫輯黎庶仰體如保之心策勵
庸駑勉效自強之責

世子冊封後謝 恩表

國本所繫冒陳早建之情天命用休忽覩游降之典奚
階報答深激兢惶伏念眇眇遐蹤兢兢餘喘承祖先之
訓益勤藩屏之誠嗣艱大之基恒軫堂構之戒恩纒渙
於繼序念先切於貽謀奏籲只遵故常覆允特出寵渥
一扎雲漢丁寧警勅之辭十襲綺羅燦爛安吉之服是
實宗社之慶豈但父子之榮伏遇與物爲春及人之幼

皇圖有永啓百歲昌熾之祥 帝緒無疆恢三代久長
之術遂令弱息獲被隆私敢不祇荷龍光毋替燕翼謹
包茅之職付托何憂懷結草之忱感戴靡極

漂流人陳成等發解 降勅謝 恩表

王者一視無外盛德咸仰於同仁天其申命用休溫綸
獲叨於異數曷勝感戴深積兢惶伏念幸際昌期忝嗣
遺緒被東漸之聲教偏荷生成守左海之封疆益勤藩
蔽屬茲商販之人口適然漂到於地方館 上國之流
逋是臣職分遵舊例而發解敢言功勞詎意渙汗之頒
兼此便蕃之錫金幣交映悉出內府之藏雨露均霑爰

及下隸之賤實非始望何幸親逢伏遇厚往薄來柔遠
能邇見匹夫之失所若已推而納之舉六合而爲家惟
皇建其極矣遂令敝服亦紆殊私敢不奉以周旋對越
咫尺扶杖聽 詔嘉與父老而共歡結草酬恩誓至子
孫而毋替

皇太子殿謝箋

貳極正位咸仰照臨之休九重䟽 恩獲被導宣之澤
拜命寵甚撫躬瞿然伏念忝守遐藩叨承先業紆上天
之眷倍切馳誠覲前星之光恒勤延頸豈意流播之發
解過蒙渙汗之褒嘉若幣若金物其厚矣如綸如綍言

惟大哉榮已優於微軀渥遍及於賤价伏遇小心翼翼
成性存望允屬於元良三善克備譽旣洽於仁孝萬
邦以貞遂令偏荒亦荷異數敢不砥礪素節罄竭丹忠
使壽使富而多男願上堯封之祝宜民宜人而受祿載
賡周雅之章

冬至賀表

地中來復動璿璣之一陽天下會同執玉帛者萬國禮
從亞歲慶洽羣心欽惟位育功高裁成道妙續堯之緒
光膺五百載之昌期行夏之時誕撫四十年之熙運茲
當敬授之節益迓茂對之休伏念德被並生恩荷再造

北極星拱迹雖阻於越鵠南至日長誠倍切於傾藿

廟闕都監 賜宴謝箋

廟闕鼎新方瞻穆穆之盛制雲天需澤獲叅秩秩之華
筵一荷恩榮兩存悲慶伏念不死喪亂更際休明承
先王經始之圖忽抱弓劍之慟奉 聖上肯構之志幸
見輪奐之休賴庶民之子來致羣工之神助重恢實係
於邦運蓋天意焉微勞何有於人爲是臣職耳方憂僞
功之誚反蒙賜宴之恩太官珍羞絡繹御厨之送上尊
法酒馨香內府之分無已太康式邀以燕伏遇道光前
烈業闡中興丕承文之謨可謂至德也已善述人之事

其惟達孝矣乎遂令微臣亦叨異數敢不旣飽以德永
肩乃心明堂禮成聳觀太平之初政華封人祝恭獻擊
壤之長言

移御新闕後王世子賀 大殿箋

天回法駕聿新光復之規日臨端闈肇正辰居之象
廟社鼎重乾坤泰來恭惟體夏禹之卑宮念周宣之考
室運承再造旣紹丕顯之謨功闡中興克成肯構之志
鬱三階之佳氣動萬寓之歡聲伏念忝居國儲獲覩盛
享鷄鳴問寢不違龍樓咫尺之顏虎拜祝堯願借玉階
方寸之地

冬至王世子賀 大殿箋

黃鍾叶律聿啓履長之昌期玉燭調元共瞻對時之新
化至和斯應諸福畢臻恭惟道合彌綸功參位育亨衢
開日月丕闡交泰之休寶曆順星辰敬授平在之象茲
當令節益擁純禧伏念叨居儲闈獲覩盛事一陽初動
復見天地之心萬壽無疆恭獻岡陵之祝

冬至百官賀 大殿箋

陽生地底載回頒朔之期復見天心欣瞻履長之慶凡
在遠者近者舉皆舞之蹈之恭惟績撫五辰道齊七政
中和位育推極聖神之功輔相裁成範圍乾坤之化屬

茲令節益膺純禧伏念猥以具僚叨逢盛際八風順序
共瞻泰階之平千歲為春願獻華封之祝

正朝百官賀 大殿箋

陽春發育聿迓天地之和正朔會同式行神人之慶叢
霄瑞色廣廈歡聲恭惟行夏之時績堯之緒齊七政而
熙績既盡敬授之功歛五福而錫民丕闡茂對之治茲
當履端之節益擁申命之休伏念備位台衡依光日月
無絲毫補仰贊裁成輔相之宜願億萬年恭獻悠久靈
長之祝

世子冕服降勅謝 恩表

申命自天既叨綸音之降推仁及幼更荷法服之頒受
賜如新銜恩倍舊伏念箕裘繼業燕翼貽謀遵禮義於
八條僅守前烈奉聲教於一統竊慕中華顧惟兵禍之
餘遂致文物之喪冊典繞渙雖欽錫魯之辭圭冕未傳
奈欠從周之制茲煩奏籲獲蒙允俞佳貺便蕃不惟光
耀於弱息睿札昭示兼承獎諭於微軀本欲粗備乎邦
儀何意特紆於 聖眷快覩七章之盛豈曰無衣驚披
十襲之藏是以有袞實為百世之珍製奚啻今日之榮
觀寵渥非常糜粉曷稱伏遇賁飾成憲黼黻 皇猷冠
帶四夷魏乎功德車書萬國煥焉規模乃令偏藩亦忝

異數敢不絲毫知感曳婁圖酬誓至子孫長懷挾纊之
惠嘉與父老永贊垂裳之治

月沙先生集卷之五十七

月沙先生集卷之五十七

三

月沙先生集卷之五十八

冊文

懿仁王后哀冊文

維萬曆二十八年庚子六月二十七日戊戌 大行王
妃昇遐于行宮九月辛丑朔二十日庚申遷 座于祖
越七日丁卯永遷于健元陵之東阜禮也素衛宵嚴玄
堂曉闢階徹祖筵仗移仙幄我 主上殿下臨鑾輅而
疚懷睠鳳翼而驚神痛長秋之永閨悲厚夜之無晨載
揚徽範俾列貞珉其詞曰天眷我東代光休命刑家以
邦閨闈最正姪姒繼作迭闡陰教協贊 聖治肇茲王

道蒼彼錦城山明水麗凝精會淑篤生 聖女崩沙表
慶夢月騰祥毓德名門爰嬪于京芳襟蘭郁玉度淵冲
位正星軒化始姬宮承乾稱大配日爲明壺政肅雍坤
儀順成躬先恭儉志絕嗜好 兩殿朝夕一心誠孝服
禮範外推仁逮下戚畹戒私宮闈飲化恩覃樛木稱頌
不斷慶繁麟趾慈愛無間河洲詠播三十餘年名增顯
號振後光前嗚呼哀哉昔遭險釁御西遷蒼皇關塞
帳殿頻移艱難顛沛益戒持危念存祛弊恩常及物深
仁厚澤浹人肌骨翟弗初旋都民聳觀三辰再炳 二
聖重歡憂虞甫釋慶福方綿詎意降割而不少延觀臺

告祲八頌局和桂曜淪精椒塗掩華萬姓兩泣百靈風
號慟連窮谷悲徹層霄嗚呼哀哉行宮天邃別殿雲虛
規寂脫簪諫阻陳書結宸悲於黼扆摧衆哀於班紳瑤
池遠兮環珮斷璿閣閉兮巾帷塵嗚呼哀哉因山旣卜
龜筮協辰禮陟有期仙御將賓晰庭燎兮厥儀鏘楚挽
兮催晨商飈起兮宮樹凋玉露淒兮羅幃寒覽芳菲之
易歇驚節序之已闌嗚呼哀哉佳城天設壽原坤寧珠
丘福地金粟名岡妥精英於上清謝塵氛於下界神庭
寂兮泉夜深隧路聞兮山扃閉杳乘雲之莫攀極遐情
於天際嗚呼哀哉仁者壽兮旣無徵德有後兮竟難恃

茫茫天理孰主張是惟至德之在人托彤管而不朽祐
鴻祚於百世流芳聲於永久嗚呼哀哉

懿仁王后追上徽號玉冊文

德音日遠曷勝攀慕之懷 聖德天高宜盡顯揚之道
爰率舊典祇薦休稱恭惟賢邁虞嬪淑伴周妣協內治
於 寧考功存 宗社澤在烝黎垂慈訓於眇躬義重
彝倫恩深撫育養不逮於一國痛又過於三年伏念叨
荷燕謀獲承鴻祚茲當同祔之日用展欲報之誠謹奉
玉冊加上尊號曰章聖徽烈貞憲懿仁王后冀諒精衷
庶紆英鑑增輝彤史丕闡不朽之名合饗太宮永錫無

疆之福

中宮玉冊文

人道造端載重彝倫之叙國風正始實闡教化之基歷
觀致治於家邦必賴相成於內外茲當殷制之甫畢備
舉繹儀之增新咨爾云云道合黃裳德昭彤管名門毓
秀夙稟沙麓之祥中壺含章允叶河洲之詠久資儲位
之輔佐密贊弘績於艱危祇奉兩宮盡二紀怡愉之樂
篤生元嗣啓百世本支之休宜膺翟蓂之尊俾承 宗
禋之重雖 皇命之已降而顯冊之有時茲遣使某官
某副使某官某持節備禮授以玉冊寶章於戲惟禮法

以肅閨庭惟恭儉以處富貴鷄鳴申戒益勉敬畏之心
麟趾覃仁永享靈長之福相予丕祚毋替德音故茲教
示想宜知悉

恭嬪追崇謚冊文

恭以顯親報本人子之至情節惠易名追崇之大典斯
彛倫之所係亦古今之攸行恭惟氣凝天和道符坤順
積德名聞爰自塗山之肇基率禮嘉祥粵在文王之初
載芳猷克著於輔佐令聞久播於宮闈宜享大德之遐
齡擬奉長信之至樂何知奄棄乎世屬子纔免於懷音
容莫攀曷堪風樹之痛歲月屢變幾纏霜露之悲迄今

嗣承乎鴻圖實荷鞠育之洪造嗟榮養之不逮崇貴何
安愴位號之始尊顯揚當惡欲報罔極願名無能肆薦
二字之稱少展終身之慕謹奉冊寶上尊謚曰恭聖冀
昭英鑑俯諒精衷玉檢金泥耀貞輝於不朽天長地久
錫繁祉於無窮

恭嬪追崇玉冊文

事光簡冊夙彰內贊之猷慶徹神明荐進追顯之號情
文爰備悲喜俱深恭惟飭躬幽閑凝姿端淑刑觀媯汭
協聖化於重華詠播河洲嗣徽音於太姒令聞方騰於
彤管仙馭奄隔於蒼梧養莫逮於東朝心詎安於南面

星霜屢變永懷欲報之忱恩誥初頒益結無涯之痛曾
因國誣之快雪聿致 宗祀之增輝惟先后輔佐之功
久而彌闡在小子揄揚之典今豈敢稽肆獻不朽之稱
用揭丕承之烈摸天畫日德何加乎檢玉泥金禮則然
矣臣不勝大願謹奉冊寶加上尊號曰明獻云云伏惟
冀賜英鑑俯諒微衷盡制盡倫維新厥命俾昌俾熾長
發其祥

上尊號玉冊文

無競維烈誕膺光復之昌期必得其名敢薦揄揚之盛
典焉能擬議只循彛章恭惟日月昭明乾坤廣大任監

撫於危惡夙著仁聲奉 廟社於蒼黃再存國命逮承
皇上專勅之寵益贊 先王丕顯之謨篳路啓山林決
進取之大策旌旗駐湖嶺成撫定之殊勲克體眷佑之
天心聿興亨嘉之邦運重華協帝之德寔由歷試之勤
周武撥亂之功實彰繼述之孝閔休既播於諸夏顯號
宜揭於千春臣等不勝大願謹上尊號曰體天興運俊
德弘功伏惟茂對令辰俯膺徽冊瑤圖御極光闡列聖
之彌文玉燭調元永享太平之洪福

辨誣上尊號中宮玉冊文

陰功贊化既尊儷極之儀顯冊揚休式薦隆名之典歡

聲騰於廣廈和氣叶於長秋恭惟月配日明坤承乾順
覃仁樛木昭太妣之徽音正始關雎協文王之盛德夙
佐艱危之績共臻熙洽之治屬茲快雪宿誣聿致渙頒
新命 璿源再正已湔訛誣之羣書 清廟重光寶賴
閨闈之懿範宜闡無疆之茂烈誕加不朽之殊稱雖地
厚天高莫能擬議而金泥玉檢敢緩鋪張爰卜良辰用
申禋禮臣等不勝大願謹奉冊寶加上尊號曰云云伏
惟俯循輿望丕率彛章上聖盡倫益煥芳猷於彤管中
宸播慶永綿洪祚於瑤圖

宣廟追崇玉冊文

荐荷皇靈獲睹雪誣之慶光昭令德敢殫歸美之誠肅
薦隆名備陳徽典恭惟功多前烈業闡中興洗 宗社
之深羞十數代彛倫乃叙守君臣之大節二百年基命
維新惟其落迪之罔愆是以續承之無忝屬兇虜構患
上國彼譖人交亂小邦騁詐行言奚爲而至也竭誠往
愬吾有所受之三韓禮義之鄉幾於禽獸一札絲綸之
降揭若日星得徵洪恩寔由成憲茲切揄揚之願聿申
崇奉之儀敷錫燕謀道彌彰於 列聖廣延鴻祚澤實
洽於後休合受殊稱誕膺弘錄臣不勝大願謹奉玉冊
玉寶加上尊號曰貽謀垂裕廣休延慶伏惟冀垂明假

俯諒微悰不顯亦臨殷享配天之祀俾昌而熾益綏永世之禧

教命文

冊封王世子教命文

廢世子

立儲以端國本實惟萬世之通規定名以繫人心斯乃百王之公義備舉寶冊申命彝章咨爾世子某正氣凝姿天和毓德生知孝敬粹然岐嶷之夙成動遵規程儼若風儀之可象英猷著於資善仁聞彰於承華日就月將不煩師傅星暉海潤允協元良宜大器之有歸寔羣心之共戴茲惟宗廟社稷之託何但君臣父子之情

肆於卽祚之初首畀主鬯之重奏已徹於萬里欣帝命之卽俞制甫畢於三年蓋縉禮之有待茲消吉備儀冊爾為王世子於戲維命不易厥位惟危爾其思王業之艱難服聖人之謨範周旋必中禮無或好驕奢而樂宴安左右必正人無或昵嬖倖而近邪佞恒念終始典學益勉朝夕納規無怠忽於訓辭以答揚乎先烈光踐少陽之位永扶太極之尊豈不休哉故茲教示想宜知悉

王世子教命文

廢世子

宗儲主鬯所以順天經貳極定名所以固國本須位序

之早正宜典冊之亟崇咨爾元子某秀挺珪璋生資岐嶷天成粹美孝友彰於因心日就溫文聰哲由於自得英譽久屬於上嗣仁聞允協於元良邦命維新子既續承大業人心所繫爾當光踐少陽茲雖建置之通規在艱危而尤重是實宗社之至計非父子之敢私茲命爾為王世子爾其念列聖積累之基思今日付托之義惟主敬以制事惟克儉以飭躬恒惇德而尚賢無啓寵以納侮終始典學毋替訓辭夙夜存誠必遵禮範於戲高明震長丕闡綿祚之休海潤星暉益行承華之慶故茲教示想宜知悉

王世子嬪教命文

廢世子

樹嫡建配所以重國本敦化基而衍萬世之鴻祚也予靈承休命首念宗社大計乃考慎舊典繼秩徽章以祈協于神人粵予元嗣英明仁孝夙鍾予懷寔正位號以繫人心思得好速用媿厥美寤寐念茲不敢遽舉咨爾云云簪纓名閥惟世積慶淑慎柔嘉克諧予心福德既全法相有屬乃薦于廟惟穆卜協吉乃告母妃惟慈心嘉悅乃詢于朝僉謀咸允茲命使議政府左議政李恒福副使知中樞府事吳億齡持節備禮冊爾為王世子嬪續女嘉祥實天作合媯泃觀刑本資內助爾

宜忱念于茲惟恭儉以制心惟禮法以飭躬毋或驕奢
毋或側頗僻迷贊坤化輔佐元良以成關雎麟趾之盛
豈不韙哉於戲宗祀之托予復何憂太平之福爾其
共享庶幾夙夜毋忝訓辭故茲教示想宜知悉

頒教文

慈殿上尊號後頒教文

立愛惟親既備成於縟禮教民以孝宜申告於多方茲
推恩於百僚示同慶於一國恭惟仁符乾造靜體坤元
協內治於七年早著雖肅之美贊末命於半夜寔隆擁
佑之恩逮予嗣服之初益見毋儀之至喬山霜露曷堪

攀慕之無從長樂晨昏自幸溫清之有所肆越五月之
後亟上二字之稱顯揚當先只頒渙號之告儀物始具
蓋待升祔之期惟率循乎舊章詎鋪張其盛德大需未
久雖數赦之難輕洪慶無前顧再諭之可已茲命在官
者各加一資資窮者代加於戲事孰為大克遂尊養之
誠惠不可專用廣敷錫之福茲爾有衆諒予至懷故茲
教示想宜知悉

中宮冊禮後頒教文

乾坤定位成覆載之功日月並明致照臨之盛故王化
之正始由人道之造端若稽往古之章必嚴建配之典

皆所以謹家邦之御重 宗祧之承也茲當綽儀之備
成用播推恩之誕告王妃某氏柔嘉淑範忠孝名門整
翟禕於東闈芳猷夙著嘗艱險於西土弘績茂禔德修
于身久矣民被其化篤生元嗣允也天降之祥肆於踐
祚之初卽昇主壺之重輝煌命服旣膺九天之榮恩誠
潔蘋蘩共盡三年之哀制嘉誥雖頒於渙號之日成禮
有待於升祔之期以本年四月二十二日授以玉冊寶
章爰覃慶於百僚聿申諭於一國茲命在官者各加一
資資窮者代加於戲以燕翼子丕闡關雎麟趾之休用
敷錫民共享洪範箕疇之福故茲教示想宜知悉

世子冊封後頒教文

廢世

予惟 祖宗積累之業益衍於貽謀邦國久長之基彌
昌於樹嫡是故夏后與子所以傳家於萬年漢文定儲
在於卽祚之初載茲豈非虔奉宗禋嗣守神器者也肆
當顯冊之備舉兼布霈澤之旁推粵予元子之賢實稟
上知之質入則視膳孝自發於因心出而就師學不煩
於資誨念 先王天篤撫愛繫寡躬日望長成頃於宅
憂之初昇以主鬯之重顧殷制未畢於中月而綽儀蓋
待於練時三加之禮容無愆喜見德器之已就貳極之
名位久正渙頒冊命之維新上以慰 列聖眷佑之心

下以副齊民顯戴之望是實莫大之慶寧靳非常之恩
自今月十一日昧爽以前雜犯死罪以下咸宥除之云
云庶幾同歡與之更始於戲勿承丕烈予一人無德以
堪之早建元良斯三代有道之長也禹明震長永迓綿
祚之休解吉渙亨咸圉好生之德故茲教示想宜知悉

世子受

皇勅冊封頒赦教文

廢世子

前星出震喜 宗祧之有歸中使自天驚冊命之荐降
宜慶典之大霈示 皇靈之遠覃念王者纂承丕基必
先乎建立元嗣故名位早定而衆罔不悅典禮亟崇而
人不爲私肆子卽祚之初首陳封儲之請覆允雖遵於

故事過許實出於異恩一札昭回誕揭錫命之旨十襲
燦爛特頒在笥之珍重荷鴻私之曲成益見國本之增
固茲推解澤之曠蕩不避渙號之頻煩咨爾齊民孰非
延頸願戴者欽我新命庶幾扶杖往聽之云云雜犯死
罪以下咸宥除之在官者各加一資宜更始之自今爰
舉斯而加彼於戲重暉重潤綿鼎祚於億年並育並生
灑天仁於萬物故茲教示想宜知悉

世子嬪擇定頒教文

廢世子

重明位正慶國本之增休大昏禮嚴喜天作之叶吉茲
當嘉事之肇舉是用渙號之誕敷念惟元嗣之良夙繫

輿民之望願爲之有室寔惟父母之心思得其好速俾承宗祀之重云云忠孝名闕素稱積德之門柔嘉令姿允合少陽之耦譽旣洽於宮壺慶實關於家邦忻悰盍先於推恩縉儀且待於蠲吉茲命在官者各加一資於戲佳兒佳婦付托予復何憂宜民宜人福祿天其申命故茲教示想宜知悉

世子嬪親迎頒教文

廢世子

二姓之好聿啓天作之祥六禮旣成益隆國本之慶茲霈曠蕩之澤申誥渙汗之音念惟樹嫡之初尤重建配之典闕睢正始風化攸基媯汭觀刑彛倫乃叙須寤寐

乎窈窕俾左右於元良云云毓自訂禮之家素幽閑之淑德龜筮協吉想先靈之監臨宮壺騰譽仰慈心之嘉悅是實宗社之福奚但父子之情宜與爾萬民同歡用示予一人有喜自昧爽以前雜犯死罪以下咸宥除之於戲爰舉斯而加彼庶更始之自今主鬯承祧益播重暉重潤之頌赦過宥罪咸囿並育並生之仁故茲教示想宜知悉

世子冕服 欽賜頒教文

廢世子

國本所繫旣正貳極之名天命用申載承七章之錫茲當異數之降用霈同慶之恩念惟元嗣之良久屬宗

祧之托冊命邁下式隆豫建之規冕服未頒奈無恒賜之例茲煩申請之奏乃蒙特許之榮一札昭回誕揭如綸之旨十襲燦爛悉分在笥之珍皆出 聖皇之隆私復見景泰之遺制緇衣之好豈但改作改爲朱芾斯皇益見重暉重潤是乃稀濶之慶曷勝感喜之情爰覃恩於百僚欲並生於一國自昧爽以前雜犯死罪咸宥除之在官者各加一資如新受賜益迓安吉之休其始自今永享靈長之福故茲教示想宜知悉

五賢從祀頒教文

天之生大賢也不偶實係消長之機德必得常祀而無

疑宜舉崇報之典茲用播告俾有依歸稽我東國之偏荒罕傳正學之宗旨箕疇布教雖識禮義之方羅代蜚英未免詞藻之陋迄至麗季千載僅見圃隱一人洪惟祖宗熙洽之辰允屬文明振作之運有若金鄭趙李五臣者出真得濂洛關閩諸子之傳格致誠正之功其揆一也讒諂媚嫉之輩誰使參之窮通有時縱負一時之屈是非自定何待百年而知惟滉也遭遇兩朝其志則挽回三代立言垂訓實是海東之考亭格非獻規不愧河南之程氏肆並隆爵謚之贈顧未遑俎豆之儀在正德紀元始有儒臣之陳請自 先王初服屢見多士之

抗章惟其舉措之難輕豈云尊尚之不至逮予纂緒恨
不同時尚有典刑奈九原之難作其從與享度百世以
為師爰答四十載顛望之情擬啓千萬歲太平之業蓋
有待而然也庸非天而誰歟茲於本年九月初四日以
贈議政府右議政文敬公金宏弼贈議政府右議政文
獻公鄭汝昌贈議政府領議政文正公趙光祖贈議政
府領議政文元公李彥迪贈議政府領議政文純公李
滉等五賢臣從祀于文廟之東西廡於戲聳動觀瞻作
新氣象是邦大夫賢者孰無尚友之心吾黨小子斐然
永存矜式之地故茲教示想宜知悉

附太廟頒教文

格于 文祖聿嚴升祔之儀錫厥庶民爰施浚汗之典
嘉與四方同慶慰此三載餘哀予以眇眇之躬屬在筮
筮之疚踐位行禮慕益切於羹墻遺大投艱懼恒深於
淵谷未釋終天之慟遽踰中月之期乃以庚戌四月十
一日丙戌祗奉 皇考昭敬正倫立極盛德洪烈至誠
大義格天熙運顯文毅武聖睿達孝大王皇妣章聖徽
烈貞憲懿仁王后祔享于太廟瞻望喬山永懷弓劍之
遠臨御法殿何心衮冕之華玉瓚黃流洋洋太廟之
靈貺鈞陳玄武濟濟明庭之縉儀旣熙事之迄成敢閱

休之專享咨爾有衆孰非先王休養之人與物爲春
宜推今日曠蕩之澤爰舉斯而加彼庶更始之自今云
云雜犯死罪以下咸宥除之於戲民日自新孰云小人
之幸刑期勿辟是謂大德曰生故茲教示想宜知悉

恭嬪追崇頒赦教文

禮莫大於尊親旣舉崇奉之典孝不匱於錫類宜推曠
蕩之恩彙章肇修悲慶曷勝予惟聖人制禮之至忌必貴
於因情王者達權之宜咸重乎報本故觀歷代之盛莫
不追尊所生斯通規之已行蓋至情之難抑永懷聖母
之毓德粵自名門之累仁輔佐寧王久著歲規之益誕

育眇質實基啓佑之休云何棄世之如遺屬予免懷之
未幾逮今嗣服之日采激孺慕之天不忍御柩捲愴餘
澤之尚在無心被袞冕享至尊而何安肆展欲報之忱
庶追不逮之養乃於是年六月初六日追尊云云備儀
物進冊寶奉安于別殿祭禮悉遵 皇朝及 祖宗故
制用以時膳俗祭親享禮成黃流玉瓚精靈恍見乎羹
墻寶牒金泥聖德昭揭於日月在古人亦皆然矣於予
心獨無忤乎肆覃恩於百僚欲並生於一國不避數赦
之戒以示同慶之懷云云雜犯死罪以下咸宥除之在
官者各加一資於戲迨遠慎終旣見民德之歸厚赦過

宥罪庶願仁聲之入人故茲教示想宜知悉

新闕移御頌教文

端臨法宮肇見重恢之象誕敷渙號用申同慶之懷徂
茲幾年乃有今日念我 先后遭家多艱披草萊立朝
廷徒切越宮之薪膽收灰燼倚墻壁未復漢官之威儀
繞見楚丘之經營遽遺鼎湖之弓劍若梓材旣勤樸斲
丕責實係於寡躬思筆輅以啓山林舊物敢墜於先業
久在偏巷何堪興慶之卑湫惟思苟完詎論未央之壯
麗爰成宣后之考室尚賴岐民之子來茲於十月二十
二日移御昌德宮新闕復臨 祖宗之遺基載受臣民

之齊賀門闕洞開丕闡嚮明之休簾陛益尊悉遵負宸
之制吾乃今始知爲貴邦雖舊其命維新惟其人心所
同然茲非天意而誰也肆用播告於有衆俾知悲喜之
予情於戲南面出治益延宅中之祚北辰居所永肩拱
極之忱故茲教示想宜知悉

上尊號頌教文

億兆願戴已旣循歸美之羣情參伍以定民盍需推恩
之大號屬茲同慶之日示予勉從之心念昔蒼皇越在
草莽責重軍國監撫寧辭征繕勤勞身任 廟社安危
敢憚艱難險阻職但効於幹盍念焉及於圖存匹馬東

南親莅虎穴之戎陣專旌湖嶺手拓鯨域之山河皆承
皇上獎勅之餘波實遵 寧王付托之成筭雖不失其
舊物詐將多乎前功茲乃 祖宗神人不釋之故亦惟
忠臣義士盡瘁而然若謂撥亂持危亦或宜矣其曰體
天興運安敢當之聽鐘鼓而思勲再整雲臺之舊畫臨
斧宸而撫迹深慙玉牒之新銘盖有待而然予不得已
也茲當禋禮之舉誕敷渙汗之音自本月某日雜犯死
罪以下咸宥除之於戲民無得而稱予實慚德於聖哲
國可幾而理庶見匹休於隆熙故茲教示想宜知悉
教書

教兩湖有粟民人募納書

癸巳知製
教時應製

王若曰予惟德涼祚薄自底顛隳喪亂之慘誠前古所
未有哀爾兩湖之民以予之故顛連溝壑者幾人遭罹
鋒刃者幾人每一念至恫焉疚懷寢固忘而食為之廢
罪實在予尚誰咎乎幸賴 聖天子垂仁拯濟亦惟我
先后默佑亦惟爾民庶不棄予扶持至于今日俾予生
還故都再謁 園陵庶幾憑仗 皇靈率協義旅以不
墜 祖宗付畀之基業而第今逋死殘孽尚據邊疆盛
其機毒日肆侵噬 天朝對壘之兵我國環寇之師殆
且數萬而師老兵疲饋餉屢絕人饑馬困莫能抵敵目

今事勢之危惡反有甚於前日二載干戈物力已竭經
年轉輸公儲既匱邊臣之告急日至 天將之譴責相
繼安康之糧又為賊剽而慶州之人不食月餘日矣予
聞此言何以為心予與度支越大小臣僚晝夜籌度靡
策不講予既汰冗官矣予既省浮費矣予既減厨膳矣
予不復煩祭祀矣予不復役土木矣亦既停貢獻以作
糧矣亦既豐賞典以募粟矣而積破之餘未易收拾農
功又歉生聚無因公私赤立上下嗷嗷經費之儲僅支
數月今者 天朝更發數十萬新兵朝暮且至以期殲
此醜類我國所自力者惟是糧餉一事其將何以哉顧

爾兩湖素多義士上年勤王赴難之徒多出其中予常
倚以為重凡予所欲為期於爾二道得力爾等其各勿
拘多少隨所蓄儲以助軍餉則予令監司一一開錄以
報有司照數施賞不踰時日宗班厚級予不敢靳予不
敢食言爾等其體予意否抑予有大愧者當初爾等之
納粟非不多矣而或有已納而不得蒙賞或有雖賞而
不稱所納以致國令不信民心疑沮是雖緣搶攘遷徙
之際報謀或漏文簿考覈之時舉行未及而皆是有司
不職之罪亦予寡昧不明之致咎實在予宜爾等之遲
疑不肯願納也然人之有財貴在散施凡遇恒人猶當

惟與况今國家阡亡君父告惡爾等亦二百年休養之
民也縱予寡劣澤未下究君主爾民庶亦幾三十年矣
到今顛危其安忍疾視而不救忍與不忍惟在爾等凡
所不願予不強迫倘使 天兵無餉而撤回賊鋒乘虛
而再捲則予之喪亡雖不暇恤其必火爾之室廬據爾
之蓄積爾等亦無遺類矣雖有粟爾得以食諸嗚呼兵
興之後賊在嶠南凡所調發皆於爾二道取辦誅求徵
歛之煩轉運供頓之苦爾等何以堪之予之負爾等多
矣誠無顏面更有告喻禍敗以來萬事瓦裂嘗膽雖切
束手何為喪國餘生寧欲溘亡而不見第以深讐未復

極痛在身願荷忠義之助以雪 祖宗之耻予實告惡
於爾等爾等其亦戚予之言乎昔卜式納粟助軍當代
稱賢後世傳名至于今為美談有為若是何代無之於
戲君誰與不足非敢損下以益上民非后罔戴庶冀共
濟而相頌故茲教示想宜知悉

教忠清監司丁允祐書

丁酉應製

王若曰睦茲忠清一道承畿輔扼湖嶺為國左臂實惟
屏翰之重兵興六載賊在嶠南徵發於是轉輸於是
天將之路於是大軍之駐於是民力之殫竭極矣列邑
之殘敗甚矣調發策應之煩承宣經理之責匪其人罔

克有濟予惟難其任詢之大臣咸謂卿宜予惟卿自乃
父服勞于我先王厥有嘉謨載王室惟家世繼忠勤
用能銜訓趾美以敦實謹慎輔予不逮歷敷臺省盖有
年矣試理于驪驪人至今思之擢居近密出納惟允攝
戶部管糧于湖西能聞朝廷予用是嘉茲授卿本道觀
察使兼之以兵馬水軍節度使又兼之以巡察使卿其
往欽哉嗚呼天不悔禍賊又稔惡閑山之師一潰崔湖
之兵鑿矣道內丁壯幾人肝腦子遺之民又驅之以防
戍迫之以運餉鞭之以徭役虐之以賦歛哀我民生何
以堪之以予之故顛連溝壑者未知幾人思之至此寢

固忘而食爲之廢賊鋒通警於海路接截方惡 天兵
屯劄於境內饋餉已竭今日事勢只在一擲緩之則大
事難濟惡之則人心先潰到此地頭予亦不能爲卿言
矣惟在卿剛柔並濟施措今中事有便宜不必稟命政
有更張無或膠柱民之飢寒卿其衣服飲食之民之疾
苦卿其咨諏撫摩之澤未下究者宣布冤而無告者疏
滌予憫軍卒之懈弛卿宜鍊習予憫器械之墮缺卿宜
修繕設險要害先定控扼之計措置糧餉惡講接濟之
策守宰之賢污卿卽黜陟之惟其公用命不用命卿卽
賞罰之惟其斷卿曾出入左右惟予近臣其徃體予意

以生吾民予不多誥勗哉卿官非通政任卿自裁罪在
大辟稟予乃斷於戲守江淮之保障冀追古人之微烈
壯關輔之藩衛勉成今日之偉績故茲教示想宜知悉
樂章

奉慈殿樂章

初獻 於皇曲

於皇我后實天生聖 啓佑我後曰篤其慶 遙追來
孝闕宮有恤 於萬斯年享祀不忒

亞獻 維天曲

維天命賡初載啓昌期 名門積慶塗山肇基 淑德

婉容顯厥儀 英徽外賁柔順中積 含章可貞體坤
則 鷄鳴進戒脫簪獻規 以順承天贊內治 播譽
椒庭揚名彤史 輔佐芳猷岳十祀 仙寢儉然徽音
如在 百世精靈庶不昧

終獻 猗我曲

猗我后正位號 揭厥美昭以告 貞輝耀無疆嗚呼
不忘 溫其恭大哉聖 慈且仁出至性 端範與淑
德光于顯冊 惟至恩實資生 聿追養盡哀榮 欲
報德罔極孝思維則 赫新廟永綏靈 祀事修黍稷
馨 著存若有聞歆我苾芬 神格思恍洋洋 既右

享鐘鼓鏘 穰穰降百祥 俾我熾昌

奠幣

我祀既吉 蠲庭燎晰光 陟降在左右 承筐幣是將

中殿樂章

思齊聖后 儷宸極 陰功替化 闡坤則 德合無疆 至

哉仁 關雎正始 憲宜人 聿迓天休 以順承 載揚

鴻號 賁中興 於萬斯年 如日昇

歌謠

附大廟時耆老歌謠 庚戌公為大提學時口號代作

耆老人 崔命世 等恭遇三年制畢 附享禮成 臣等不勝

感激欣抃 誠歡誠忭 稽首稽首 上言于主 二殿下伏 以
澹澹然 平安甫畢 清廟之縉 禮欣欣 有喜色 載瞻法
駕之威儀 八域歡聲 三靈協氣 恭惟以周元子 為舜重
華 丕承烈丕顯 謨誕撫百年之熙運 善繼志善述 事光
嗣 十聖之洪休 粵自儲宮毓德之時 久係率土延頸
之望 揔節制於湖嶺 不負 皇上專勅之恩 奉 廟社
於蒼黃實贊 先王再造之業 歸啓之謳歌 有屬繼堯
之精 一是傳孝 俯襄麻一洗 漢文之陋制 禮嚴籩豆 備
舉周家之盛規 鏗鏘鐘鼓之音 哀慕尚留於八彩 輝煌
羽旄之色 佳氣已浮於九街 舜顛堯肩 宛若重瞻我

附錄卷之五

月沙先生集卷之五十八
三十一
先后殷輅周冕依然復覩乎彌文是以有袞衣欣太平
之有象庶幾無疾病慶聖曆之無疆臣等俱以喪亂餘
生自幸復更毋死繞釋鼎湖乘雲之痛更賀咸池昇日
之祥飢而食寒而衣何知帝力手之舞足之蹈恭獻民
謠詞曰

明明我后至仁天覆聖學日就爰自青宮德孚功隆再
奠吾東北載書筵小心益虔三善克全繼垂衣裳行此
通喪念切羹墻在疚惇惇格以至誠可徹神明歲月駸
駸禫祔奄臨哀慕益深乃駕龍馭八鸞騰翥旂常婀娜
太室於穆至止肅肅禮容不忒臣工奔走奉璋執豆在

左左右黍稷芬芳簫鼓鏘鏘伊嘏我將神其樂康陟降
在傍降福洋洋金輿載旋化日中天祥雲後先垂髻戴
白填街溢陌爭頌聖德我后克孝色笑以教萬民是效
朽人不死杖鳩來止聳觀熙事何以祝之壽考維祺介
以純禧願言瓜瓞綿于周室垂千萬億

月沙先生集卷之五十八

月沙先生集卷之五十八

三十一

月沙先生集卷之五十九

呈文

呈閣老禮部科官文

甲辰○冊封奏請
使時在北京作

謹呈為冒死申辦事職等悶感之極不揆事體屢干嚴
威僭越之罪大矣老爺援據經常大義嚴辭以絕之温
語以誨之不啻提耳而面命此固守正之論職等固不
敢強顏更陳雖然天下之事有經有權立嫡以長以絕
奸窺此之謂經也大亂猝至國勢剪焉社稷為重擇嗣
圖存此之謂權也以經則人心泮渙以權則羣情鎮定
以經則禍亂難紓以權則恢復可期當此之時而猶且

泥於常經不思所以變通者乎金重於羽而羽有時或
重於金嫂不可援而嫂有時援之以手歷觀古史因時
制權者何限然未有如小邦今日之存亡所係萬不得
已者也臨海之狂病憤亂光海之聰明仁孝之狀已悉
於寡君之十年咨奏以老爺之明鑑非不洞燭而猶且
以臨海為別無失德以職等為私於光海以封進之奏
為非寡君之意此職等所以冤痛罔極直欲剖心而無
從者也職等雖無狀亦有人心孰非其國之臣孰非吾
君之子敢容一介私字於其間哉况寡君英明果斷總
攬庶務一事之微亦不怠忽矧此上奏請儲是何等事

而任臣下所為乎天地鬼神昭布森列咫尺 天威焉
可誣也若如老爺之教則是舉國羣臣盡負罔上專輒
之罪職等寧伏斧鉞於 天朝而不忍歸報於寡君也
至於臨海之失德則寡君既不忍直書於咨奏陪臣亦
何敢盡言於今日然奏中既曰不遵訓戒又曰積失人
心則其失德之狀何待歷數而後知哉自古安有不遵
父戒而能幹其蠱積失人心而能世其業者乎且老爺
之教有曰臨海之陷賊非降也至舉天順時事為證此
則大不然光海之權立始因國人推戴而乃在壬辰夏
初去城之前臨海則受寡君召募之命舉措多失淪陷

賊由乃在於壬辰之秋此豈因臨海陷賊而有光海權
立之舉哉位號已定名分有截以長以賢非今所論只
恨老爺不得親臨小邦目覩臨海之所為與夫舉國之
羣情耳 天朝若盡察事情則必無終阻之理小邦雖
十請不獲必無易置之理非不知姑且徐徐以待 恩
典而只是人心國勢日急一日惟其屢請而屢阻是以
愈久而愈鬱危疑之象不可盡言汲汲焉如不及者深
恐一日稽遲有一日之悔也寡君為此不避煩瀆連歲
控疏職等亦安敢以干冒為嫌不盡未盡之懇乎伏願
老爺平心細察焉職等不勝惶惶悶迫之至

又

謹呈為更將一款冒死申稟事職等不揆事體累干嚴
威前後呼籲不啻煩複伏蒙老爺不以僭越為罪酬答
如響慰諭明白是知小邦事情老爺既已畢燭而惟以
捨長立弟有乖常典執為峻斥之辭職等更將此款申
稟一語而退自古帝王因長子失德以次子為嗣者上
自王季無恤下至漢唐宋班班可見今不必煩為毛舉
只以本國之事言之前例之可據者亦非一二康獻王
長子芳毅有病以第三子為嗣請於 天朝太祖高皇
帝即准許是為恭定王也又恭定王長子禔初封世子

已受命於天朝厥後有失德以第二子爲嗣更奏
天朝成祖文皇帝卽准許是爲莊憲王也懷簡王亦
有長子婷而以第二子賢上奏天朝憲宗皇帝立
以爲嗣卽康靖王也以上恭定王莊憲王康靖王皆享
國長久恪守侯度號稱東方聖主在昇平無事之時處
變之舉亦已如此况今大亂之後國勢危疑而光海君
不特賢明仁孝更有受勅戡亂之勞績乎天朝典訓
只爲守經之常至於外國之事則固未嘗以此而有所
阻禁列聖所爲昭可觀也至於今日獨廢已行之例
久阻通國之情實職等所未曉也伏願老爺平心舒究

更考前典以慰東韓百萬生靈之望不勝幸甚

呈撫院文

謹呈爲作速併奏事小邦以請冊一事節行奏籲天
朝許之亦久而未及快降恩典上年奏請陪臣回還
時禮部奉聖旨着令小邦詳議來奏方許准可仍令
遼東督撫查訪候本國更奏之時一併具奏因此老爺
將禮部咨會內事理轉行小邦使之查報故頃者寡君
備將光海君前後受勅茂著勲勞之實狀及小邦臣民
推戴之至情另具一咨委差陪臣李信原報於軍門及
老爺前一面專差卑職等更奏朝廷蓋以聖旨然

也臨海君之積失人心光海君之賢且有功已悉於寡君前後咨奏今不必更陳寡君既因一國羣情定儲於危亂之初光海君又受 皇上專勅效勞於兵戈之際域內之民戴為吾君之貳今已十有三年位號既正名分有截以長以賢非今所論特 天朝未及詳燭遠外事情姑且遲延今則寡君瀝血之奏屢徹於 宸聰東民踴望之情亦暴於 天朝故 聖旨既許再奏禮部又令併奏小邦之人無不歡忻感激行待 冊命之降而顧此大事不容一日淹置於危疑之境職等今將實奏前進不日當徹 天庭聖旨所謂一併具奏此其時

也禮部之所請查訪不過查訪敝邦實情所謂敝邦實情具在於李信原賚之啓目下查訪此外無他寡君常以事君不欺為恪守侯度之一節豈有一毫非實情以煩籲 君父之前至四至五之理老爺亦豈忍捨寡君查報之咨奏而更求實情於他處乎伏願老爺洞燭小邦人心時勢萬不可已之狀與夫寡君父子兄弟毫髮無他之情備將前咨作速轉奏以慰東韓延頸之望不勝幸甚

呈軍門文

同上月

謹呈為申稟事小邦以請冊一事節行奏籲 天朝許

之亦久而未及快降 恩典上年奏請陪臣回還時禮部奉 聖旨着令小邦詳議再奏因令遼東督撫查訪候本國更奏之時一併具奏因此遼東撫院將老爺咨會內事理轉行小邦使之查報故頃者寡君備將光海君前後受勅茂著勲勞之實狀及小邦臣民一心推戴之實情另具一咨委差陪臣李信原查報於老爺前一面專差卑職等更奏於 朝廷蓋以 聖旨然也職等伏覩李信原賫持老爺回咨有曰候遼東撫院會藁至日會同具奏云云老爺於小邦之事體念至此小邦之人誰不感激頃者伏聞遼東撫院已行查報於老爺伏

想老爺亦已會藁併奏卑職等受命於寡君日月已久途中厄潦今始得到薊州之界寡君之奏不日將徹天庭或恐老爺於董戎多事之中未及轉奏使一併具奏之 旨未免參差敢此仰稟於下執事嚴程有限不得迤後他路躬懇於轅門之外不勝惶恐隕越之至伏願老爺赦職等僭越之罪諒寡君懇迫之誠速行轉奏以慰東韓延頸之望下萬幸甚

書契

答對馬島主義智書

書來就認體履康迪慰豁良多所獻禮物足見誠款俱

卽轉啓收了仍將土宜及今辛亥年例賜米豆各五十碩付回來使惟領納公貿物件並令該道隨便許貿但審來章縷縷以不許上京不復舩數責我以變約顯有不满之辭殊無自反之意把讀再三一駭一笑貴島之於我國自先世忠順不懈我朝之所以恩撫寵綏者亦勤至矣惟其信義相孚未嘗飭備於邊壬辰之事夫豈所料思之至今言亦慘矣天道不僭曲直有在一時勝敗非所論也揆以大義固不容共戴一天况可與之修睦乎爲緣日本盡棄前轍專使請好貴島悔罪自新革面求款寧人負我無我負人不念舊惡是爲大德交隣

之道縱許再修接遇之典理難如舊茲加裁損定爲約條雖不能一依前例以今論之亦已優矣貴島苟念向來所爲如何我朝之寬貸如何則當感幸踧踖之不暇何敢復有希冀哉五十舩舊例以庚午之作耗而減爲三十三之舊例又以壬辰之入寇而減爲二十是皆貴島之自取非我朝之變約也况沿途館宇未復上京勢有難便本道物力殘破接遇難比平時是亦事理之然究厥所由果誰之咎足下試思之熊滿熊壽盛氏澄泰等俱是平時受職之人負國稱亂罪已難容決不可更許接待且熊滿之受職蓋以前島主之子也聞足下

有子名彥三以足下之忠款賞宜及嗣平景直刷還人口自其父久効勞績並皆轉啓給付圖書俾各歲遣一舡皆異數也信使時隨行有勞松尾有右衛門等二十三人各賜綿紬有差統希盛亮朝廷之待貴島至矣足下其亦思之耶今旣盡棄前愆偕之大道足下果能惕承朝命罄輸誠悃則褒嘉之典自有新命何必規規於已棄之舊例乎永世敦好之福自今伊始足下其勉之節逼歲除惟冀新社順序自玉不宣

東萊府使答景直書

歲船之來就審雅履康勝慰倒朝廷以足下世効忠勞

特授嘉善重秩旣為受職之人當自來朝今反致書於禮曹又求公貿非舊例也邊臣不敢轉達只以足下之意稟覆于朝廷則朝廷念足下自先世嚮國勞績且多刷還之功特賜圖書恩至渥也足下感念今日異數回思向來愆殃勉遵前烈益輸忠款則兩國隣好之福吾等與有幸焉惟足下亮之歲律已窮只祈新社益茂不宣

答對馬島主義智及日本忠摩州太守行長等書
書來具悉示意開慰良多敝邦與貴國各守封疆二百年來世敦隣好唯其信義不絕未嘗飭備於邊不意壬

辰之年貴國無故興兵襲我不戒八九年間干戈糜爛
敵邦之廟社丘墟生靈魚肉是固貴國先絕於敵邦敵
邦何嘗有負於貴國求之於義曲直自有所在一時之
勝敗強弱非所論也茲者貴國尺書過海要尋舊好交
鄰有道如果誠信交孚敵邦亦何必邁邁推阻第貴國
謀事喜變敵邦從前受瞞非一丙申年間天朝冊使
銜命遠臨敵邦隨致信書而詔墨未乾兵鋒繼至敵邦
之不直貴國於是滋矣以故聖天子赫然震怒敵邦
亦思征繕以圖自守不復以信義相期茲固非敵邦之
願而亦豈貴國之利哉况今天朝經理都察院萬鎮

守提督李監軍按察杜等大衙門統率總兵以下諸將
領及水陸官兵十餘萬按臨屯守敵邦事無輕重大小
悉聽皇朝裁處不敢有一毫擅越往日貴使其時
天將帶去天朝時未回來厥後無便遂缺報章勢雖
使然殊用為歎想足下有以諒之便回草草不盡

禮曹堂上答義智書

惠書就審體履清順開慰良多歲舡既復隣好永敦凡
貴島所要十許八九朝廷恤憐包荒之德亦已優矣意
足下感惕欣戴之不暇今見來書顯有悖慢之語其曰
念舊惡匿宿怨者是恨之也其曰不仁不道義意甚非

者是詆之也其曰遣近臣必矣望時莫恨貴國雖有粟
僕得以食諸者是脅之也不准恨之而又詆之不唯詆
之而又脅之看來駭訝莫曉其故兩國交際貴在誠信
辭命之間當主謙恭貴島雖僻處海中素不習禮義之
訓而豈不知犯上悖理之為罪忘德背恩之為禍乎豈
足下別有異圖故欲生釁假此而為之辭乎朝廷本不
信貴島而亦不料變態之至此遽也當貴島之始請修
好也朝廷羣議多以爲義當斥絕而朝廷以天地溷容
之量納貴島革面求款之誠滌瑕蕩垢借之大道向使
朝廷念舊惡宿怨則貴島片帆寧得以過海乎足下不

此之思而反以悖語相加自絕于天天可欺乎上京一
事前書已盡而今復脅迫至此耶自日本稱亂構逆之
後 天朝之赫怒至今未解頃者我國奏聞 天朝欲
修舊好則 天朝只許到館開市而不許上京經理楊
御史另出諭文張掛於釜山館門足下若取見其文則
可知之矣今日我國之事悉遵 天朝指揮毫不敢擅
越館宇之未復物力之未完特餘事耳貴島苟能恪承
朝命忠順不懈則朝廷當更奏 天朝而 天朝亦豈
終阻乎足下毋爲忙了也至於館墻退等事橫截大路
功役重難而示意如此卽令地方官吏從速割等耳且

別紙所稱曹汗每潛取倭商白銀事極駭且憤朝廷爲
貴國雖許開市而彼此潛商則國法甚嚴苟有奸犯必
殺無赦故東萊刺史據法捕囚上聞朝廷自是邊臣職
分之事今足下過聽倭商之訴乃以爲取蔽秘在至於
舉名指斥且以奸民潛約手跡轉徹於朝廷東萊刺史
奉命朝廷主管館事體貌尊重從前貴島無不相敬而
今乃誣慢至此何不諒之甚耶書中足下旣稱倭商之
銀大國理難較辨已令東萊刺史覈出送還而曹汗每
則懸首館街以懲惹事辱國之罪譯官崔義吉不能詞
察奸弊致令侮及朝廷並令拿問科罪足下並宜知之

歲船續至帆檣相望苟有所言自當順付而今以微瑣
之事別送規外之舡似非約條無乃褻瀆耶願足下謹
遵新好之約勉蹈先世之忠使兩國共享無疆之福幸
甚夏令方嚴惟冀若序自玉不宣

禮曹答義智書

海帆風便尺書踵至就審盛暑眠食順序欣慰不已示
諭上京一事始與貴國復修舊好也稟請於天朝則
天朝只許館接海上往來通市而已不許上京故上年
結約之時亦不曾話及此事只講歲遣之數圖書之驗
耳今者天朝經理東征都御史楊鎬按節再來方駐

境上我國之事悉聽裁處國儲受封冊使又臨法制甚
嚴耳目昭布故邦理難擅許貴島若能輸誠効信久益
不懈則敝邦須上奏 天朝得其准許之後重建京館
照舊接待另是一局停當何乃忙為不須迫也舡尾五
男婦領謝厚意柳川平公今既受職於朝廷不得直為
致書於敝曹不敢違例報答幸以此書並布餘祈新秋
體履保重不宣

月沙先生集卷之五十九

